

*ASO GAFUA, 01 MATI 2021*

*Na nofoia e le Fofoga Fetalai le Nofoa i le itula e 9:13 i le taeao.*

Tatalo.

**FOFOGA FETALAI:** Ou te faasilasila atu ua amatalia Tualumaga ma Galuega a le Fono Aoao Faitulafono.

Malo le lagi e mama, malo le soifua manuia, malo foi le tauatai i le faatinoga o le tatou Fonotaga i lenei aso.

**TULAFONO TAU FAAOFI O LE FAATATAUINA O TUPE  
FAAOPOOPO (NU.1) 2020/2021 – felafolafoaiga faaauau i luga o le  
faitauga faalua – Aso 30**

**FOFOGA FETALAI:** E tolopo Galuega a le Fono Aoao i le afiafi o le Aso Toonai, ua maea ona saunoa le Afioga i le Minisita o Tupe.

Ia, ma lou faaaloalo, ou te tapa lau Afioga i le Minisita mo Aoga, Taaloga ma Aganuu. Tulai maia lau Afioga i le Toetaufanua e te saunoa e tusa ai o mea sa laga e sui usufono mamalu.

**Afioga Hon LOAU SOLAMALEMALO KENETI SIO (Minisita mo Aoga, Taaloga ma Aganuu):** Ou te faafetai atu i lau Afioga i le Fofoga Fetalai i lenei taeao. E manatu foi e tu ae li'a, pe a matau o lele ua malu le taufaanuu. Ua malumaunu le tiasa, aua le malae i Tiafau nei. O le ala lea lau Afioga i le Fofoga Fetalai e faapoipoi lilia ai se faamatalaga. Tulou. Ia, ne i o ta tapisa ona feala lea o aitu o le fale tau aitu, aua Samoa ma lana faafofogaaga i lenei taeao.

O le ala lea e faatulou ai i le afio mai o lau Afioga i le Fofoga Fetalai, alafai mai lau Afioga i faguga lelei i lenei taeao. Ae a le paia o le Maota? Lele ua malu mauga ua liligo ai vanu ma pau le tuavao. Ua paia lena tala na atoa i le afifio mai o sui usufono filifilia o le Palemene.

Ae a lea tala na atoa, lea e afio mai le Taitai o le Malo lau Afioga i le Palemia ma lou auvaa, ua malumaunu foi le tiasa aua le afifio mai o Minisita Lagolago ma le latou tapuaiga. Ae a le tapuaiga a Samoa ua potu i lenei taeao i Ofisa Sili o Pulega o Matagaluega ma Faalapotopotoga Tumaoti a si o tatou Malo. Malo afua ailao ua maua. Faafetai i le alofa ma

le agalelei o le Atua i lo outou soifua ma le ola, o lea ua toe taitaiina mai i lenei taeao e faaauau tiute ma galuega e pei ona tofia ai.

Lau Afioga i le Fofoga Fetalai, ia o le tala e fagogo tagiao i le faafofogaaga a le atunuu, ioe, e ao ona toe talatala, le tala ua logologa aua le toa o Salevaogogo. Fai mai o le tama Atua, fai mai na fia taalo i le taaloga o le aigofie, ioe. Ae i ai le tamaitiiti Fogaa, e augapepe lava, fai mai sa fai le la taaloga. Fai mai na taaalo i le Amouta ma ua malo, toe taaalo i le Amotai, e faapena foi. Ia, ona tali lea fai mai o le aso toe nai Moamoa. Ia e faapena se agaga lau Afioga i le Fofoga Fetalai i lenei taeao, fai mai foi ua maua malo, ia ona foi lea o le tama. Fai atu i ai lona tama, tago lea i le fau o malo ma fusifusi lapalapa na ma momoli i Fogaa. E momoli e a i Fogaa? E i ai tagata la e i ai. E faapena se lagona i lenei taeao. O lea ua e tago i fau o Malo ma fusifusi lapalapa ma momoli i Fogaa aua la tatou faafetai ma le faamanu i le Atua o Malo, na ia tapuaaoina le soifua ma le ola o le Palemene. Ae a Samoa? Faafetai i Lona alofa ma Lona agalelei, ua malie pule ua malie Malo. Ou te manatu foi o lea ua togo malama ma ua gafua ai le ata e pei o le tala i le siuaau o le fale Tuamasaga.

Ona ou manatu lea ia o le a ou le aea le pou nai Falesoa pe ou te tofu foi i le tofuola na ae ai le aso o le Malietoa, aua o Samoa ua taoto ona upu popo, ua taape ma maape le falealii o Tumua nai le Tulimataala i paia ma sa o Samoa e leai lava se vave na te toe ulumatauluina. E manatu foi i lenei taeao lau Afioga i le Fofoga Fetalai, lele ua ee i lagi laofie ma lelepa faavaatiu i vāsā le maualuga o lenei taeao ma le aso, o le ala lea e tatau ai lava ona ou faatulou. Ou te faatulou i le malae i Tiafau nei, fai mai o le malae o le faautugatagi o lo o seumalo ai upu o si o tatou atunuu, tainane tu ma aganuu a Samoa aua lona lumanai. O le malae ua titi tonoa ma potofia ai laau na filitofi, seu faatamaseu ai le tofa ma le utaga, ina ia lalaga lava ni manu aua Samoa ma lona lumanai. Ona ou manatu lea ou te tu ai i le faga o Seuga lau Afioga i le Fofoga Fetalai, ou te tu lava ae popoe leaga o lele ua mamalu ma maualuga le taeao ma le aso. O lele ua matatupu matatamalii le Maota nei.

E ao lava ona ou faatulou aua le faafofoga tapuai mai a si o tatou atunuu o Samoa i lona aoatetele. Ou te faatulou ai i le afio o Le Ao Mamalu o le tatou Malo ae a le tapuaiga i lana Masiofo. E faapena foi ona ou faatulou i le tapuaiga i lana Afioga i le Sui Tofia ma lana Masiofo. Ae a le Maota nei?

Ou te faatulou atu i lau Afioga i le Fofoga Fetalai, Sui Fofoga Fetalai aemaise o sui usufono o le Maota, le Afioga i le Palemia ma le Aiga Minisita. Tulou, tulou ia. Ae a se faafofoga mai a le Afioga i le Faamasino Sili ma le vasega o le Faamasinoga. Le Afioga i le Peresetene ma alii ma tamaitai o le Faamasinoga o Fanua ma Suafa. Malo le tapuai a o alofaiva la outou Palemene.

E ao foi ona oo se faamatalaga ma faatulou aua le paia ma le mamalu o Tamasa i le Lagi, o suli ma feoi o le Talalelei o lo o faapena ona faanonomanu ma tatalo i le ao ma le po aua se manuia o Samoa ma laveai mai i ni mala tatou te le iloa.

E ao foi ona ou faatulou aua le faafofogaaga mai a Samoa i ona tulaga faalupe, aua le tapuaiga a Aiga ma latou Tama, o Tama ma o latou Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti. Tulou. E faatalofa atu.

Ou te manatu foi e le galo a ta ē o i Atua, aua le paia ma le mamalu o le Faigamalo ma le tapuaiga faalelea a Tutuila ma Manua, i le afio o le Alii Kovana ma le Lutena Kovana ma lana Aufono faapea le Fofoga Fetalai ma sui o Maota e lua. Ia, o paia ia aua Sua ma le Vaifanua, o Fofu ma Aitulagi, Saole ma Saleaamua ma le Launiu na Saelua. Ae a le Alataua? Afio le Laau na Amotasi, Faatui o le Motu, alaalatai le Tootoo o le Faleula ma upu ia te oe le Manuatele. O paia ia, o paia faalanugata o Samoa ou te le toe poupouina faa-falemasofa aua ua atoa sa o Tupu i ou maota tapuai ma ou tafai lelea. Taalolo, tulou, tulou ia.

Ia, se i ou seu ane tasi lava i fanua lau Afioga i le Fofoga Fetalai, ne i ota matele i le aapa ae galo ai lota piitaga. Ina ne i ou foufou sii lou vaa i le afaga o tautai ae galo mulivai o aele i le faitauga mulivai o Samoa aua le tapuaiga a si ou itumalo.

Ia, ua ou manatua ai lava le upu e fai i Fogaa, ua maniti le tafuai sa logo, ua ati i manava, ua afulia e pei o le upu ia Malietoa ma Vaapue. Aisea? Leaga e le faigofie le tapuaiga ma le faafofoga mai a si ou itumalo. Sagaga le Falefa, Luatua ma lou Gautaala, le paia i Aiga e 3, tapuai mai se i fai se sao o lo ta itumalo. Ae a Fogaa? Ia ou te le tau fai atu, o Loau lea e tautala. O oe lava o le uso tuofe. Ona manatu lea, Samoa e, mapu ane ia i Niafane ma lafo lou taula i malolo. Mapu ane, ioe. Alo i lau fale tapuai se i fai se sao aua upufai o le tatou Malo.

O lea ua tala matasoo le naaloo o le seuga o le a ifo, ona ou tu ai lea i le fogatia ma tepa ane i le togafale i le soosootuli o la outou tapuaiga ona ou popoe lea, ne i leai se manu e faailo aua le filiga ma le matila. Ua ou manatua le tala i le suagaipo nai Avarua fai mai na saele fua lava. Na o le tiuga nai afolau fai mai na ae fua, e faapena le faiva na alu le i toiu ni manu mo le taliuta. Talofa e, i le faigata ona fuafua aua se tala a le vao e pei o le upu e fai i le vao o Tagaloo. A mulumuluaufoe ma vaatetele, e utu lava le tufu i ulu o le tufu.

Lau Afioga i le Fofoga Fetalai, e afea se tala e pei ona tulai atu e ala i le tofiga o le Minisita o Aoga, Taaloga ma Aganuu. Ae a le Iunivesite Aoao o Samoa, aemaise le Faalapotopotoga latou te iloilo ina Faailoga Taualoo po o le SQA. O tofiga ia na tofia ai au mai le 2016, na aumai ai le faatuatua o le Afioga i le Taitai ou te taitaia lenei Matagaluega tele. O le upu moni lau Afioga i le Fofoga Fetalai, e gaogaoa ma osooso le ala, e le faigofie le

galuega. Ae sa tuu lava i le Atua le vaivai. O le ala lea o le a fofola le fala ina ia manino le mata o le vai, a o le a foi se galuega a le auauna vaivai i lenei 5 tausaga. Ma o le vaaimamao ma le vaai lautele mo aoaoga mo nei ma a taeao, o le a mafuli se faamatalaga i galuega ua maea ona faatino ma faatino i lona aotelega. O le Tala Faatatau o le Tupe, o tulaga na ausia faava-o-Malo, o tulaga na ausia e le itulagi, o aotelega o galuega faatino na ausia i totonu o si o tatou atunuu o Samoa.

O le agaga lea lau Afioga i le Fofoga Fetalai, ia motu le pa a ua iloa. Ia ma aua foi ne i oti i tua se finagalo o se isi. Tali atu i manaoga, aua le Palemene nei, i sui usufono o e sa lagalaga mataupu e faatatau i le Matagaluega o lo o faapena ona i lalo o lau vaavaaiga. A matau lau Afioga i le Fofoga Fetalai i le Tala Faatatau o le Tupe, Tala Autu o le Tupe mai lena 5 tausaga, e matautia, ioe. Le lufilufi aao mafola o le tatou Malo, e ave lava le faamuamua i le Matagaluega o Aoga pe a matau i ai. E ave lava le faamuamua i le Matagaluega o Aoga. Aisea? Atonu e tofu lava le tagata ma lana tali, tofu le tagata ma lona faauigaina. A o le tala a le Minisita, o i o le puna o le matavai. A ola aoaoina fanau e manuia le atunuu, popoto fanau, manuia aiga. A atamamai fanau, manuia Ekalesia. O le ala lea. O le ala lea e ave ai le faamuamua a le tatou Malo i tausaga uma, tausaga uma, tausaga uma. Ioe. Ina ia popoto alo ma fanau. A lea ua tatou vaai, ua fua mai. O le upu moni lena. Ua fua mai le laau fai mai na faasusu ma toto ina ia ola. Ae a lenei taeao? E matau lava i le saofaiga, a na leai le Matagaluega o Aoga e leai lava ma se isi o outou o alaala mai i i, ioe. Ia, fesili ane fesili ifo. O ai na e atamai ai, o ai na e poto ai? Ioe. O lena, ou te le tau fai atu. I can see Olo is not in his head...

**Afioga Hon Faumuina Tiatia Faaolatane Liuga (Palauli le Falefa):**  
Lau Afioga i le Fofoga Fetalai...

**FOFOGA FETALAI:** Malie lau Afioga i le Minisita o Aoga, se i tulai mai lava le toe Ulutaia o lea itu o le Maota lau Afioga... E i ai se mea o...

**Afioga Hon Faumuina Tiatia Faaolatane Liuga:** Faafetai. Manaia tele le saunoaga a le Afioga i le Minisita. Na ona faamanatu lava i le Minisita, o lou tama ma lou tina na amata ai ona ou aoga. O lau faifeau na ou faitau pi ai mai le a e oo i le v ae faatoa ou sau ai i le aoga tulaga lua, ua 5 ma le afa ou tausaga. Ma lou faaaloalo lava. Na ona faamanatu i ai, o lea e galo le isi vaega muamua o le aoaoina o tamaiti. Faafetai.

**FOFOGA FETALAI:** O lena e lavea i totonu o le lio. Ia, tulai mai le Minisita.

**Afioga Hon LOAU SOLAMALEMALO KENETI SIO:** Ia, ou te faasaoa foi le Afioga i le sui usufono. A o ai na poto ai le faifeau? O ai na popoto ai ou matua? Ia, ou te le fai atu, o lena.

**FOFOGA FETALAI:** O le mea lea e leaga ai le lagalaga maa. Faaauau le saunoaga.

**Afioga Hon LOAU SOLAMALEMALO KENETI SIO:** O le agaga tonu lena o le Malo, ave le faamuamua i aoga. Ioe.

**Tofa Nafaitoa Talaimanu Ketu (Gagaemauga Nu.3):** Lau Afioga i le Fofoga Fetalai, ua ou le fia faalavelave a, pe maua se avanoa.

**FOFOGA FETALAI:** Ia saunoa mai lau Afioga i le Sui Fofoga Fetalai po o le a se isi mea, po o aoga lava a matua.

**Tofa Nafaitoa Talaimanu Ketu:** E ese le taua o le mea lea ua oo i ai le saunoaga a le Afioga i le Minisita o Aoga. E leai na ona fesoasoania'i lava i le tulaga o le galuega. O lea ua fesili, o ai na poto ai le faifeau? O ai na poto ai matua? A o le fesili la, o ai na poto ai le faiaoga? O lea lava tatou te maua uma, le Atua o oe o le poto ma le atamai o mea uma. Ne i galo i le Afioga i le Miisita, ne i see le vaa, ae galo ai le taula. Ma le faaloalo.

**FOFOGA FETALAI:** Ia, manaia le faamanatu a lou uso. Se i tulai mai le Afioga i le Minisita.

**Afioga Hon LOAU SOLAMALEMALO KENETI SIO:** Ia, ne i galo Afia i si ona vao. O le Atua o le poto o le mataisau, ou te le toe oo la i ai i le tulaga lea, ua tatou silafia uma, o Ia e ona le poto. Ona aumai lea i lalo i faiaoga e faapopoto atu ai ma le aualii ia. O lea la ua i ai le taeao lenei. Ae sao le Afioga i le Sui Fofoga Fetalai. A lea na ou paepaea lava i le taeao ma oo le faafetai i le Atua i Lona poto ma Lona alofa. Ae leaga o lea tatou te i lalo o le lalolagi nei, ioe. O lea tatou te i lalo o le lalolagi. E faaoga ai la meafaigaluega ina ia faapena ona faasoa atu, tufa atu le atamai. O le ala lea lau Afioga i le Fofoga Fetalai, ave le faamuamua i le tatou Malo. O le faaogaina, ia ou te le tau fai atu, ioe. O tala o tupe, Suetusi Sili, sue tupe, faavasega, aumai i le Palemene, ioe. E leai lava se mea o gasea, e leai se mea o faanenefu. E malamalama uma mea uma. Na amata mai o \$89 miliona i le 2016, ae a le taimi lenei? Lea ua \$122 miliona, ioe, faatino ai galuega ma le naunautaiga o le tatou Malo ina ia ave le faamuamua i aoaoga i totonu o lenei 5 tausaga.

E saunoa soo lava ma faapena foi ona talatala e le Afioga i le Taitai o le Malo le tulaga o tatou aoaoga i le taimi lenei ma le fesoasoani a le tatou

Malo. U a oo i ai se faamatalaga ona o le taua i le faafofoga mai a Samoa. O le a le mea sa tatou i ai i lenei vaitaimi o tatou i ai? Totogi le pili e matua, ioe ina ia malamalama ai le Maota lenei. Totogi e matua, e tau saili, e fai le salimata, tau le koko ma faaputu le popo. Ae a lenei vaitau? Ioe, aoga fua alo ma fanau, ioe. Aoga fua. O le tamaititi lava la e le mataala ma le sogasoga, o le afu lava o le le tau o lau o le faamoemoe. E \$18 miliona lea ua faasafua foi i lenei Tala o le Tupe. Sa \$14 i le Tala o le Tupe talu ai, a o lea foi ua agai i luga. Masalo e oo atu foi i se isi Tala o le Tupe lea ua siisii atu foi i luga. O le naunautaiga lava lea ia atamamai ma popoto alo ma fanau.

E le faapito manu ia tasi lau Afioga i le Fofoga Fetalai le faasafua a le tatou Malo, e le na o aoga a le Malo ae faapena foi i aoga a le Ekalesia ma aoga tumaoti e oo i ai le fesoasoani, ave i ai le faasafua, e lufilufilima lelei, aao mafola. O aoga a le Ekalesia lea ou te vaai atu e \$5 miliona le tausaga lenei, e totogi ai le faiaoga, e faapena foi faiaoga o aoga tumaoti. E \$5 miliona. O lenei fesoasoani ua mafai ai ona aaoaina fanau e aunoa ma le totogiina o ni pili. E maua ai meaaoga ma le tele o isi atinae eseese sa le mafai ona maua e nisi augatupulaga ua mavae. E taua tele.

E i ai le sui usufono na tulai ae ma fai mai, faafetai o lea ua totogi pili o tamaiti aoga, e sa'o. O lea e i ai faiga faavae ia a le itupa o le SQA ma le NUS e faatatau tonu lava lea fesoasoani i e o lo o faapea ona tatou taua, le upu foi lea fai mai o le limavaivai, ave i ai le fesoasoani e totogi ai pili aoga o tamaiti NUS faapena le SQA o lo o fesoasoani i le tulaga lea. E tusa ma le 1,000 tamaiti lau Afioga i le Fofoga Fetalai ua mafai ona ave i lalo o le polokalame lea e fesoasoani ai le tatou Malo e taua atu i le SQA ma le NUS e fesoasoani i pili aoga o le au lima vaivai. O le taua lenei. Aisea? Ioe, Leaga o le manulauti lenei a le Malo, for the people of the people by the people, ina ia aua ne i valetuulimaina le lumanai o tupulaga tuputupu ae. Leave no one behind. Mo tagatanuu uma o Samoa, mo Samoa ma ona tagatanuu.

Ona ou oo mai lea i le fausiaina o faleaoga lau Afioga i le Fofoga Fetalai. Tasi lea mataupu e lagalaga e le toatele o sui a faipule, Loau, Loau alofa mai, lo ta faleaoga, lo ta malae. E pei o se pese faatagiao ia te au. E fesoasoani lo tatou Malo e taua i faiga paaga ma atunuu i fafo. Aisea? Ia o ai se Malo valea e foai ni a latou tupe i se Malo e le lelei ona faafoe? Ae a la tatou matau? Iapani, Saina, Malo tele o Amerika, fesoasoani i le fausiaina o a tatou faleaoga, lelei ona faafoe. E mai lava i le 2016 ina ua ou taunuu mai, o lea ua 52 faleaoga ua maea ona fausiaina. O la lava e fau lava e oo mai lava i le taimi nei lau Afioga i le Fofoga Fetalai, o la lava e fau, e le tuua le galuega. E faatoa tatala atu foi i le masina talu ai isi faleaoga fou. Matou te o atu ae fai mai le loomatua, auoi, se ua matuai ou o...f...o. Le tosoga o le ofo a le loomatua matua. E matautia lenei mea ua matou vaai i ai. Aisea? O le naunauga o le tatou Malo ina ia ave le

faamuamua. E i ai le upu tatou te fai soo, e le o le anofale a o le fale, e le o le fale a o le anofale. A o lea foi e saunoa le Palemia, se e o gatasi lava le lua lea, e o gatasi lava le anofale ma le fale. A lelei le fale, e popoto le anofale, e fiafia e o i le aoga aua foi o la e matagofie le potuaoga ma lelei mea uma. O le agaga foi lena a lo tatou Malo, o lo o taumafai ai ia faatofutofusia ma oo le auaunaga aua le tulaga tau faleaoga. Ou te talitonu foi ua faamalieina le Maota nei, i nisi sa lagalaga lea tulaga i mea tau faleaoga.

**FOFOGA FETALAI:** Ia malie lau Afioga i le Minisita se i tulai mai le sui usufono mo Faleata, le Afioga ia Faumuina Wayne.

**Afioga Faumuina Asi Pauli Wayne Fong (Nuu Tu Taulaga Sisifo):** Faafetai lava i lau Afioga i le Fofoga o le Fono mo se avanoa. O lea ua oo tonu lava le uso a Minisita i tulaga o faleaoga. O le fesili masani lava lau Afioga i le Fofoga o le Fono, e ala atu i le Minisita. E faamanatu atu le matou faleaoga lea sa taofia, lea na taofia ua le mafai ona fau. O lo o faatalitali pea po o le a se tulaga o i ai.

**FOFOGA FETALAI:** Faafetai lava, lau Afioga i le Minisita tulai mai e faaauau le saunoaga.

**Afioga Hon LOAU SOLAMALEMALO KENETI SIO:** Faafetai i lau Afioga i le Fofoga Fetalai. O le upu a le atunuu e le faapito manu ia tasi. Ne i matau mai foi le Afioga i le sui usufono, ai ua sopoloa le vaai a le Minisita ma le Matagaluega. E leai o la ua i ai oe, i totonu o le faavasegaga o le fuafuaga a le tatou Matagaluega. A na le tele lou tomumu faapenei ua fai lou faleaoga.

**FOFOGA FETALAI:** Se i tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia):** Lau Afioga i le Fofoga Fetalai, ua ou faapea e tatau lava ona toe foi i tua le tatou tilotilo i faiga faavae a le Malo. E le o se tiute lea o le Malo, ia le mea lea o le fai o ni faleaoga. O le mataupu lava lena e fitoitonu i nuu, ae le o se masani lea sa i iai le Malo. Ou te manatua le aoga maualuga lea sa fai i Aleipata i Lalomanu. Faatoa ou toe tomanatu nei po o le 1960. Sa tasi ai le aoga maualuga e sau lava mai Aleipata, Lepa, Lotofaga, le itumalo o Lotofaga. Ona fai loa lea o le iuga a le nuu o Lalomanu, e aveese le aoga maualuga lea. Ae o le a fai ai le latou Tulaga Lua. Ona aumai lea, tuu loa e le Malo i lena taimi e ofo mai se nuu latou te faia le Kolisi, le aoga maualuga lea. E mai lava Aleipata Itupa Lalo, Itupa i Luga, Lotofaga, Lepa, ae oo tonu lava

i le taimi lea i le tausaga e 19...faasolo mai i luma. Ua ou tau tomanatu po o le 1964, na fai ai loa le falesa o lo matou nuu. Ia na manatu ai loa le matou nuu o le a latou faia le faleaoga. Tuu ma le eleele e fai ai le Kolisi. O lea la na tasi ai le Kolisi, sau lava mai Aleipata e tau mai i Lotofaga, sa faaigoa ia Aleipata Secondary School.

O mea na sa fai i na ona aso. Ae oo nei, o lea ou te tau tomanatu po o le 1995, ua tuanai le Ofa i le 1991. Na alu ai le polokalame a lo tatou Malo, o se taimi muamua lea ua laa atu ai loa le Malo, ina ua tele, ova i le 100 faleaoga na talepe e le Ofa. Ona o le taimi muamua loa lena faatoa laa atu ai loa le Malo e fau faleaoga o nuu. Na talosaga ai foi ma le fesoasoani a Niu Sila. O au la sa faafoea le Komiti e toa-tolu, sa matou malaga i tua ma vaai po o fai faleaoga ia pe leai. E i ai nuu na avatu ai, ou te manatua o i i Neiafu. Na alu ai lau taamilosaga, ou alu atu e vaai le faleaoga, ou fesili atu po o le a le tulaga o le faleaoga. Fai mai le toeaina o Taaufai sa i ai i le taimi lea. Aua e te popole Tuilaepa o lea e loka uma i i, i le fale lea. Ae ou tilotilo atu i le falesa lea e tulai mai, lea sa faaleaga e Ofa, ua fou uma apa. Ona ou fai atu lea i le toeaina lea, talepe le fale lea e loka ai mea na avatu. Ae fai mai le toeaina, se aua e te popole o lena e i ai uma. Ou fai atu, talepe ou te fia vaai i ai. O le taimi lea o ou Minisita o Tupe. E talepe ifo i lalo, e leai lava ma se mea o i ai, ua uma ona fai a le falesa. Ona ou faatonuina lea o le nuu, fai le faleaoga lena na avatu e le Malo. A le faia le faleaoga, o le a tapuni le tou faleaoga. O lea la na o mai ai loa le nuu fai le latou loan fai ai le latou faleaoga ua divert ese.

Lau Afioga i le Fofoga Fetalai, e siliga ma le 115 faleaoga na faaleaga na fau ai e lo tatou Malo i le fesoasoani mai a Niu Sila ma le fesoasoani mai a lo tatou Malo. O lea na faatoa amata ai le polokalame lea o le laa atu o le Malo, talosaga loa ia Iapani e fesoasoani mai i le polokalamme lenei. O lea la e alu ai lava e tau mai i le taimi lenei. E aoga mea tutupu lau Afioga, e i ai le mea na ou maua i le nuu lea o Samusu. E alu atu le matou asiasiga ua vaoa uma le mea, ae o lea ua uma ona tufa atu ia apa. Ae ou vaai atu na o le ....ou faapea toetiti 3 futu le maualuga o le vao. Ona ou alu atu loa lea matou o ma le Komiti e vaai. Ou te savali atu i luga o le vao, ae ou tu i le...ou faalogo atu e paoo mai mea i lalo o vao, ae susue atū, o la e taatitia i lalo o vao ia apa. Tiai ai, leaga o mea e maua fua. Na ou sau foi lea alu atu le faatonuga. A le faia le faleaoga lea i totonu o le 4 vaiaso, ua tapuni o lea e fai i le fale o le nuu tapuni le tou faleaoga. Ona faatoa gaoioi ai foi lea o Samusu. Matou te o atu i le Fagalao o pala mai le silia ma le 100 tagasima i fafo ona faaoga foi lea o le malosi lena faale-Malo e tapuni pe a le faia le faleaoga. Lau Afioga i le Fofoga Fetalai, o uiga ia e masani ai tatou, o uiga faale-tagata. E maua atu loa le mea e maua fua, faaoga sese loa. Lau Afioga i le Fofoga fetalai, o lea la e alu ai lava le polokalame. E silia i le 115 le aofai, o faleaoga sa fau e lo tatou Malo, ae na amata mai i le tulaga o le afa lea o Ofa. E oo foi la i le polokalame lea sa ou tau atua fesoasoani



lea ua oo i le \$18 miliona. Na amata mai i le Tala Faatatau Autu o le tupe na tuu i ai e le Malo i totonu na o le \$50,000 i le masina o Tesema i le 1983, mo le tausaga fou 1984. O lea la ua oo i le \$18 miliona. Ma o le itu taua i le polokalame lea, o lea sa oooo tatou upu i Aoga Amata. E masalo ou te faasalalauina mai i lau polokalame ia le aofai o le faasoasoaga lea, e ese lava ia tupe e ave i Aoga a Ekalesia, ae ua ave foi i Aoga Amata. O le tele ia o Aoga Amata a le EFKS, Katoliko faapea foi ma le Metotisi, ma isi Ekalesia. O aoga ia sa faalupe o aoga a faifeau, o lea la ua le o toe taua faapena, a ua Aoga Amata. Ou te faasaoa ai foi la le saunoaga a le Afioga i le Minisita o Aoga, i lea ua oo lava i Aoga Amata, e amata ai ona aoao le faitau. O lea ua faatupe atu foi e lo tatou Malo. A o mea ia sa fai fua, o le vaega o le tautua a le faifeau i le Atua.

Lau Afioga i le Fofoga Fetalai, o le faleaoga lea sa taua nei o lea ua tali atu. O le tusiga o le ata ia, e \$600,000 e le i amata le galuega. O se faiga faavae ua le talafeagai. Aua e sao loa le mea lea, o lona uiga o le a alu uma ai lava faleaoga, o le tai \$2 miliona. A o le mea lea sa ou tulai atu, o lea ua faaoga le faiga paaga lea ma Iapani. E i ai foi taimi ua laa mai ai Saina fesoasoani, e i ai foi taimi ua laa mai ai le EU fesoasoani, e i ai foi le taimi ua laa mai ai Amerika fesoasoani. A o le polokalame lava ia malosi faaaauu pea, o le Malo o Iapani. E le uma le agaga faafetai i le Malo o Iapani. A o le fua la lea e fua ai, e \$300,000, agai atu a sili po o le \$20,000. E faapena le latou fua, e fua i le latou vaai. E vaai foi i ata, e vaai foi i le tender mai a latou e ono faia. Ua tapena e le JICA a Iapani ia faamatalaga uma ia, ina ia matua latou iloa le tau e alu ai le faiga o le faleaoga. O le mea la lea, e pio loa le Komiti, ona le talafeagai loa lea o le tau. Ae o le mea moni lava, e tataua lava ona uma le faleaoga i le tupe lea e aumai e Iapani. O le tulaga foi o le tele o isi aoga, e pei e agai tele i le faa-fogafalelua. Ae manatua la a faa-fogafalelua, e tele loa le mea e tataua ona fai. E eli i lalo le faavae ia matua malosi le faavae, aua ne i luluina gofie ma pau ai, lau Afioga i se mafuie, aemaise le taimi lenei i le tele o mafuie ma suiga o le tau lea ua i ai. O le tulaga lava la i mea faapea, tusa o le fesoasoani lena a le Malo auala mai ia latou faiga paaga. O le a lava le mea e sili atu, fai lena ma sao o matua e ana fanau ia e aooga ai. Ae a lelei lava le posiposiga o le tupe, e ova. E ala ona ou taua le mea lea lau Afioga, leaga e i ai foi ia le faleaoga o le matou nuu sa fau ai i le mea lea, ae ou te le tea ai, matou uma ia e galulue i Apia. E matua matou vaaia lelei mea tau tupe ma le faaaogaina. Ma o le faaletonu lava, sala i latou e faatinoina le galuega. O lea la e lava ma totoe seleni ia e aumai e Iapani. O le ala foi lena, o la foi e i ai foi latou inisinia, o la foi e i ai o latou tagata e atamamai i tau o mea ia e fai ai faleaoga. E matua malamalama lelei ia le JICA i le mea e lava ai le faleaoga ma potu e manaomia. O lea foi e fesootai ma le Matagaluega o Aoga. Lau Afioga i le Fofoga Fetalai, o le toe faamalamalama lena.

O le SQA, na faapogai i le manatu o le Kapeneta, ua i ai aoga ia ua fai i inei. Ua nonofo ma ave BA ma MA i tagata e le i pasi ni SC, faaopoopo atu i ai ma PhDs. O le ala lena na fai ai loa le mea lea, ina ia aua ne i tauvaleaina lo tatou atunuu. A fia maua sou Doctor ia e alu i Samoa e maua gofie ai. Mo le puipuiga o le integrity o le education system a Samoa, lea na faatu ai le mea lea. E oo lava la i Iunivesite faapea foi ma faailoga ia ua faaee nei e isi Kolisi o mataupu silisili. E tatau ona matua siaki lelei e le SQA po o talafeagai. Tatou te le mananao e ula tagata i fafo i a tatou faailoga. E ala ona tupu le mea lena, ona e faaeteete le mea lena. O lea e i inei isi o la e feoai ma BA na fai i le 4 masina, ia ma le Doctor na fai i le 2 masina, o lea ou te iloa. Lau Afioga i le Fofoga Fetalai, o le faaeteetega lena. Ina ia pasi mai le tagata i Samoa i aoaoga nei, ae aloaia i le tulai atu i galuega ma le o atu foi i fafo. O le ala foi lena o lea sa taulamua ai Samoa i le aumaiga o le Kolisi lea a Ausetalia faatu i inei. I le fono sa usuia a matou o Taitai, toetiiti lava teena e le Palemia o Ausetalia, ae o le malosi o le tatou finau, e taua le i ai o le Kolisi a Ausetalia i Samoa nei. Aisea? Aua maua lou faailoga, mai le Kolisi lea a Ausetalia, e tusi ai lava le igoa o Ausetalia, o le pasi mai le aoga o Matata eseese a Ausetalia. A o atu la se toa-lua i inei, o lea na pasi mai le aoga lea, ma se toa-lua na pasi mai i le tatou trades i le NUS. E o atu i o, ua o i le tatou Quota, ae o i se kamupani ae ave i ai o la tusi ia. O fea le tusi e ono talia e Ausetalia, e talia lava le tagata o lea e alu atu ma le pasi a Ausetalia. O le natura lena o le soifua. Lau Afioga i le Fofoga Fetalai, o le toe faaopoopo atu lea ona e taua tele le toe foi i tua, ia tatou malamalama i le mafuaaga na mafua ai lea mea ma lea mea. O lea la e faaauau pea e lo tatou Malo ia le tulaga lea, o le ave o le fesoasoani ia tatou aoga.

O le ala foi lena, e taua tele ai le galuega o lo o faatino e le Malo o le vaaiga o le fale lenei po o sefe. Ona ua i ai mea ua tutupu i fale i aso ua tuanai. E uma ona fai le faleaoga ae le umi lava ae toe leaga, e oo i le fola e malepelepe ma taetae. Lau Afioga i le Fofoga Fetalai, o le fesoasoani atu lena, e faapupula atili ai le sao o le Malo, i le tulaga o aoaoga ma le fausia o faleaoga.

**SUI FOFOGA FETALAI:** Tulai mai le Minisita. Malie...e le maua se avanoa, o lea ua saunoa le Palemia e faamalamalama. O lenei lava mataupu ua matauina e le Nofoa, sa mamafa i ai le saunoaga a lau Afioga ia le sui usufono mo Taulaga Sisifo. Ma ua ou manatu, e tele avanoa sa talanoaina ai muamua lenei mataupu, e uiga i lou faleaoga. O le mea la lea, o lea ua faamanino atu e le Malo. E le gata i le saunoaga a le Minisita o Aoga, a o lea foi ua toe faamanino e le Malo nisi o itu taua. E faapena ona...e le faapitoa manu ia tasi i lou faleaoga lau Afioga e, le sui mamalu, a o le lautele o le atunuu. Ona faapea lea, o lea foi ua saunoa le Minisita o Aoga, ia taoto atu i le tulaga o le faagasologa o galuega. Tatou alu ai faapea, aua e

le aoga ona oo atu i faafinauga ma feteenai, a o le measili o lea ua saunoa mai le Minisita e lafo atu. O le a faapena ona silasila i ai.

**Afioga Faumuina Asi Pauli Wayne Fong:** Faafetai i lau Afioga i le Fofoga Fetalai, e leai ua talia foi ma le agaga vaivai. E na o se faafetai e momoli atu i le Afioga i le Palemia, o lea o le a fai pau lea, ae leai se faafinauga. Ma le faaaaloalo lava faafetai.

**FOFOGA FETALAI:** Malo faafetai. E faapena se lagona aua..amuia foi ta ita a ta tulai mai e laga se mataupu e fitoitonu i lo ta itumalo. A saunoa mai lava le Minisita e taoto atu o lea o le a faatino, ia tuliloa le saunoaga lena a le Minisita i le tulaga o le lumanai ina ia faagasolo galuega, o la e lavea ai ta ita i totonu o le lisi. Faamalulu atu, malie lau Afioga le sui usufono o Faleata. Tatou agai i le mataupu o la e saunoa mai le Minisita.

E a, e i ai se mea ogaoga mo lou itumalo?

**Afioga Salausa John Ah Ching (Faleata Sasae):** Lau Afioga i le Fofoga Fetalai, e le o se mea mo le itumalo. O le faamalamalamaga e fia faaopopo i le taua o le mataupu lea.

**FOFOGA FETALAI:** Oi e leai, e le manaomia se isi faamalamalamaga. E le lavea i faauilavea le mea lena. Ia malie le sui mamalu, se o le mea lea, o lea e toso sese ai a tatou Fono.

Tulai mai le Minisita e faauuau le saunoaga.

**Afioga Hon LOAU SOLAMALEMALO KENETI SIO:** Ia faafetai i lau Afioga i le Fofoga Fetalai, o lea e matau atu uma uma ona faamalamalama uma e le Afioga i le Taitai o le Malo nisi o fuafuaga ma tulaga e pei ona i ai aoaoga le SQA le NUS, o lena. Ae seivagana ai le tagata e matua le lelei lava lana vaai, pe le lelei foi lana faalogo. Ona sao ai lea o le failauga a le isi toeaina lau Afioga i le Fofoga Fetalai. Oi talofa ia te outou e fai mata ae le vaai, ina outou o atu ia i le falemai e vaai ni a outou vaaiga. Oi talofa ia outou e fai taliga ae le faalogo, ina outou o atu ia e fufulu outou taliga ina ia faapena ona outou lagona ai le tala e pei ona fai atu. O lea ua faamalamalama uma le tele o le vaega. Aisea? Ina ia manino, aua le auaunaga. Lau Afioga i le sui usufono, o la ua pasi le FK, e uma loa FK, treasury oo atu loa ia oe. E a o e malie? Ia lelei. O lo o faagasolo le galuega, e talatala aua lava i le tatou Fonousu, o tulaga na ausia i le faavae Malo. E ese lava le tatou lotoifale, e ese foi le vaai mai faava-o-Malo aemaise o le tatou faaitulagi o le Pasefika. E taua ia o le mea lea. O lea foi na fesiligia ma tautalagia po o fea o i ai le aoaoga e ala i le literacy ma le numeracy. O lea foi sa toatele foi sui usufono na lauga ai ma aumai le faafetai ia te au. Ua siitia le mea ua tatou oo i ai, na amata o faaletonu mai

le 2015, 2014 i suesuega. Faasolosolo mai lava lea, o le a le taimi lenei? O lea ua 91%, toe 9%, ae laititi lena pasene pe a fua i ai, i si o tatou atunuu. O tamaiti aoga lava ia lea ou te tautala i ai, taatia ia le aumatutua o lea ua pasi ma le aoga. O le aualii lena e aoga ai le nusipepa foi lenei e alu ai le faitau, ae o aoga lava ia ou te tautala i ai, e 91% la ua oo i ai, 91.9%. Ioe, maualuga le tulaga ua i ai i le taimi lenei. E pei e faapena le tatou galuega e alualu i luma ma atagia ai, o lo o faapena ona lelei ona faatino. O le NUS, SQA, aemaise le Matagaluega o Aoga, e taua lena ina ia manino. O lenei foi vaitau lau Afioga i le Fofoga Fetalai, e le toe po malae aua lenei tausaga o le 2019, tatou feagai ma le misela. Ona sosoo mai ai lea ma le Kovid-19, ae le o ni tamai faamai. Sa satia ai le sa o le Matagaluega o Aoga, aua le aoaoina o alo ma fanau. O le tele o fetuunaiga, fefulisai faalaaau mamafa po o le a se faiga e fai ai ina ia faapena ona oooo le aoaoga i alo ma fanau. E le faigofie le misela sa tatou i ai, tapuni aoga, pe faapefea ona fai, pe faapefea ona oo le auunaga. Faaaoga faiga faatekonolosi i nei ona po. O lea foi la ua taua ai, aua tatou te le ma iloa. Pe uma le misela sosoo ma le Koviti, e le iloa pe sosoo ma se isi faamai tele i le matau, po o le tosua po o le to le sua. Tatou te le iloa, aua o lea ua agai mai lava le tele o faafitauli o le lalolagi. Fai ma tatou toe tepa i tua, ina ia manino. Ae le mafai lava ona tuua le galuega ma le auunaga e tataua ona aoa alo ma fanau. O lena foi la na agai i ai ia le Matagaluega aua le faaleleiga o faiga faaneionapo po o le faatekonolosi. O lea foi ua tatou matau i laina ua uma ona tatoso mai ma cables. E fai lau tala i le isi aso, big cable small usage a o le taimi lenei, big cable bigger usage. O le mea lea e momoli ai le agaga faafetai i le Minisita ma lana Minisita Lagolago i le tatosoga o la cable. O lea ua oo ai le auunaga i tua i aoga. O le taua lea, aua o foliga vaaia lea o le tatou agai i luma, o le a le toe i ai ni api ma nei mau A4. E na o si au tablet lava ma lau laptop e te aoga mai ai lava, aoga mai le fale, aoga mai tua, po o le telefoni. O devices ia o lea ua amata ona agai i ai le lalolagi, leaga o lea e faatupulaia le faamai, ona o le ola le amiotonu.

O fesootaiga na lau Afioga i le Fofoga Fetalai. E i ai le tala foi lenei o le faaleleia, siitia o fesootaiga faatekonolosi mo aoga uma. Ia maua uma alagaoa mo aoaoga i luga o upega tafailagi. O faamoemoeaga na o le Matagaluega o Aoga, tuu i luga o upega tafailagi, ona aoa mai ai lava lea o fanau. Ia siitia tomai ma agavaa o faiaoga ma tamaiti aoga, i polokalame faatekonolosi e faatino ai aoga. O le agaiga lena i le taimi lenei, ia lava tapena ma saunia lelei aoga uma. O faiaoga, tamaiti aoga ma matua. Pe a te i foi ua toe tapunia foi a tatou aoga. O le a le mea o le a fai? O fea a tatou tua i ai pe a te i ua toe tupu mai foi se isi faamai tele. Ua tapena le Matagaluega lea tulaga e faaoga ai ia faatekonolosi po o faiga i nei ona po. E i ai le auunaga la e faapena ona faatino i lenei taimi. Ia, e leai lava se faiva e asa ma sona maumau lau Afioga i le Fofoga Fetalai. E i ai foi ona faaletonu, ioe, faafitauli i mea lava e tutupu, ae o lo o taumafai pea

taumafai pea. O lo o galulue faatasi ai le Matagaluega Faatekonolosi aemaise o le Matagaluega o Aoga ina ia faapena ona au lava ma oooo le auaunaga. E faapena le agaga. O lea foi ua i ai le isi auaunaga lea ua uma ai ona fesootei le Regulator ma le matou Matagaluega i mea o satellite foi nei sa faapena ona tapisa ai foi i le isi taimi, o lena la ua uma ona faataatia i lona taatiaga, ioe. Ui sao lava i le faitotoa fai le tulaga lea ona faapena lea ona amata le auaunaga. Fiafia. Ou te faafetai ua maua lea auaunaga. E le o se mea leaga, a ia fai le auala e faapena ona taatia ai i lona taatiaga tonu. O lea foi la ua fesoasoani mai le Regulator e faaauau le auaunaga lea, a faapea e le o oo atu isi laina, faaoga le satellite. Ioe. O le taimi lenei, o lea ua faataatia faiga ina ia faapena ona oo atu i se taimi o lenei tausaga po o le ogatotonu ua faapena ona atoa le auaunaga lea. E kiliva ai i tua ma maua le auaunaga a le online e aoga mai ai tatou alo ma fanau mai tua ia ma totonu foi o le taulaga.

Ia, o tatou faiaoga i le le lava, e tele lava foi ina outou saunoa i lea tulaga o le le lava o tatou faiaoga. Ia e tele ona mafuaaga, e le na ma le laina lea tulaga e pei ona fai atu, ua o i isi galuega, ioe. O le tau leai o ni faiaoga I lena itumalo ma lea itumalo, lea foi la e fai le polokalame ina ia faapena ona logosaia ma o i tua e agai mai tamaiti e omai i le aoga faafiaoga. Afai e isolate le tou nuu i tua, e tataua ona i ai ni tamaitai ma ni alii faiaoga o le tou lava nuu, ioe. O lau augani lena i totonu o le Matagaluega ma le Iunivesite, vaai mai tamaiti i tua, ave i ai le faamalosiau ma o e talai atu i ai le talalelei, omai e faiaoga. Aua e le mafai ona sau le tamaititi Siumu e faiaoga i o i Aleipata. E tataua lava ona i ai ni alo ma fanau o Aleipata latou ia e faiaoga i a latou aoga. A o le taimi lenei e alu atu le Falevao e alu e faiaoga i o i Samusu ae faapefea la ona alu i le taeao? E leai se pasi. O lona uiga e oo i o ua tuua le aoga, ioe. O le mea lea matua a o outou faalogologo mai, o le agaga lena, uunai a outou fanau e o i le Matagaluega o Aoga. O e faiaoga, aoga faataitai, tulaga lua, ia e oo lava i luga i le Kolisi ma e tele avanoa lau Afioga. Matau foi e tofogi fua faiaoga i uta i le NUS. E aoga fua. Ioe. E pei o le galuega foi lenei pei e foliga mai e faatama i ai se isi pei e foliga mai e le anoa i o latou mafaufau, ae ese le taua o le aoga faafiaoga. E tele foi ina faitio i le leaga o faiaoga. E i ai le pese foi lea a faiaoga e masani ona usu, sii ma ona sii, sii ita i luga, ae fai mai foi o faiaoga e le aoga. Ia ae silasila i le faafanua o galuega ua fua. O le taua ia o lena pese pe a ta usuusu ai nei i le aoga o nai faiaoga, ae tele ina faitio foi i ai le toatele.

**Afioga Aliimalemanu Alofa Tuuau (Alataua Sisifo):** Lau Afioga i le Fofoga Fetalai...

**FOFOGA FETALAI:** Ia malie lau... tulai mai lau Afioga i le Taitaifono o le Komiti o Tupe.

**Afioga Aliimalemanu Alofa Tuuau:** E leai se agaga e faalavelave a o saunoa le Afioga i le Minisita i le saunoaga matagofie. Na pau se talosaga, se i toe faamalamalama laitiiti mai lava, tatala faalautele mai le saunoaga lea i le aoga fua o faiaoga i uta i le NUS, ina ia foia ai le faafitauli lea e tulai mai i talosaga a alii ma faipule. Faafetai.

**FOFOGA FETALAI:** Malo. Ia, masalo po ua maua mai, e tuu le avanoa. Na ou tuua le avanoa i le Taitaifono o le Komiti o Tupe ona o ia o le Taitaifono o le Komiti o Tupe. Ae o le fesili, se i toe faalautele mai lava le tulaga lea sa e saunoa i ai o le aoga fua o faiaoga? O le tulaga lea? I uta i le Iunivesite. Ia se i tulai mai lau Afioga.

**Afioga Hon LOAU SOLAMALEMALO KENETI SIO:** Ia, faafetai mo le faafesili e faalautele ai foi se faamatalaga. O le Faculty of Education i uta i le NUS, o i e aotauina ai tatou faiaoga, e totogi e le tatou Malo e tauala mai i le NUS i le tupe lea a le tatou Malo e ave i le paketi a le NUS e totogi ai tatou faiaoga ia ma aoga ai. O lona uiga la, o sikolasipi a le tatou Malo pe a tuutuu i se isi itu. E totogi e le tatou Malo, ae 3 i le 4 tausaga o aoga, ioe. E aoga fua. O le agaga lea. Ae a fua i ai i totogi i le taimi lenei o faiaoga, o le tasi lea matata aupito sili ona tele le totogi lea ua i ai nei lau Afioga i le Fofoga Fetalai. Ioe. E amata i le \$25,000, \$27,000, \$29,000, \$30,000 ma agai atu lava e amata ai, ioe, e amata ai. O le mea la lea, e faapena. A o faalogologo mai matua, se uunai lau tama e alu e... ioe. O le isi mea, e nofo lava lau tama i ou tafatafa pe a faapea o tua e... e tau le sau i le taulaga. E faiaoga lava, e savalivali i le Primary School lale e maua ai lava lona totogi i ina i le va lene e tau le sau fua i tai, ia ma lua mafuta ai lava ma si au tama teine seia oo ina matua ia ma fai sona aiga. Ioe. O le isi lene mea o lea e tulai mai e sioki ai faiaoga o le isi itumalo, ua fenofoi foi ma fai aiga o nai tamaitai ma nai alii, ia ona o lea i o i Savaii aua o Savaii e i ai le tamaloa, ma alu atu ai foi lava ma le faiaoga. Ioe. Ia o lene. Ia ona fetuunai ai lea e le Matagaluega pe faapefea ona fuafua. Matau mai pe a faapea ua tele i ae... leai. O le mea lea, a o faafogafoga mai matua, uunai, uunai alo ma fanau e o i le Matagaluega ma o e faiaoga.

**FOFOGA FETALAI:** Malo faafetai. Malie le Minisita se i tulai mai le Taitai o le Malo po o se isi foi faamalamalamaga.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le mea e fia faamalamalama atili. O le itu lea e taua ona e i ai isi o tatou tama fanau ua vase le laina, ona sikolasipi lea i fafo o isi i luga atu o le laina ae le avanoa isi.

O le itu taua lau Afioga, o le siitia atili lea o le maualuga o aoaoga i le Iunivesite. E le tau o la i fafo, o lea lava e maua faailoga degree i inei. O le itu lea e taua ona e pei e naunau lava le tele o matua e ave fanau i fafo. Ae i ai foi la taimi e fesuisui ai faiga faavae a le Malo o Niu Sila ma Ausetalia, aemaise lava la taimi nei o lea foi ua matua afaina lava na Malo ona o le faamai o le Koviti, ua fesui ai foi ma latou faiga faavae. Ua le o toe tutusa foi la le malosi o sikolasipi po o le tele latou te aumaia. O le mea tonu lava lea na ala ai ona faatu le tatou Iunivesite i le 1983 i le iuga na fai i le 1983 ma amata ai loa gaoioiga i le 1984. E le faapea e oso pea le la. E i ai taimi e timu ai, taimi o faalavelave, taimi e tuutiitia ai avanoa nei mai fafo a o lea ua i ai le tatou Iunivesite. O lea la ua fanau mai le aoga o le faiga faavae mamao lava na faataoto mai i le tausaga e 1983. Ma o fonotaga foi sa faia aemaise i le taimi lea i totonu o le Kapeneta, o le taimi tonu o lea e matua tele le faaletonu o tupe maua a le Malo i le faatoa tulai mai ua matua masofa le tulaga tau tupe o le Malo, a o lea la ua lagalaga ai le manao. Ma o upu lava sa fai i le Maota lenei, o le a foi le mea o le a toe fai ai lenei Iunivesite? Ae mafai ona fai se Iunivesite i le \$5? O le mea ula le mea lea. A o le agaga tonu lava lenei, o le vaai mamao a le malo, e i ai taimi e tulai mai ai faafitauli, a ua i ai le tatou lava Iunivesite. O lea la ua tulai mai faamai, ua tulai mai tulaga pagatia o Malo, ua amata ai ona vaavaai laumata Malo uma o lea e fesoasoani mai, aua ua ave foi le faataua a latou ia i o latou faafitauli aemaise o le gasegase lenei. O lea lava tatou te vaai atu iai, ua tapuni falefaigaluega. Ua leai ni galuega a tagata. E faitau miliona ma miliona tagata i Amerika ua leai ni galuega, ua faapena foi la ona aafia ai ma fesoasoani e aumai a Malo mai fafo mo atunuu nei e tai pei o tatou. Lea lava ua sau i luga o faasilasilaga le faanoanoaga o le Faalapotopotoga o le Soifua Maloloina o le lalolagi, ua amata ua vaai atu i le manatu faapito o Malo tetele ua muamua togafiti o latou tagata, ua tau le mamafa ia latou le fesoasoani i isi atunuu. E le o ni upu avane ai la lau Afioga i le Fofoga Fetalai upu lapatai, upu lapatai lea e avatu e matou nei e malamalama lelei i le psychology lea ua i ai atunuu o lo o fesoasoani mai i atunuu vaivai, ua ese, ua sui atoa. O lona uiga, a tatou tutulai atu nei e faataoto atu ni fuafuaga ua matua le talafeagai, o i e maualafia, o le upu lenei, e maualafia ai loa le le toe aumaia o ni fesoasoani.

Ae i le tulaga lava ia tau aoga, o le tulaga lenei lea ua i ai nei, ua ese le mea lea ua i ai atunuu. A o le itu lea e taua, o le faamalosi atili o le tatou Iunivesite o lo o i ai nei le NUS. A o lea foi ua tatou maua le isi suiga tele lea ua i ai nei, o lea ua suia le Iunivesite o le Pasefika, ua le toe taua o le Iunivesite faapitoa lava mo Faatoaga, a o lea ua lautele. O le Iunivesite mo mataupu lautele. O lona uiga o lea ua toto i i le fatu mo le faalautele atu i isi foi tomai.

O le mea la lea o lea ua amata faatalanoa ma tatou paaga, a faapea ua i ai se suiga i tama fanau, e a la pe a silasila ifo i nisi ituaiga fesoasoani pe a

faapea ua taugata tele le avatu i fafo, ae aumai loa ni nai seleni e fesoasoani i le tatou Iunivesite i Samoa nei. A o le agaga atoa lea, o lea e nofo i totonu o le aiga, nofo i tafatafa o le tina ma le tama e vaai lelei ai. Ua tele naunau faalavelave ia e tutupu i a tatou fanau, o isi ua pule i o latou ola. Aisea? E i ai lava le mea lea ua manatu, ua manatu i le le mafuta faatasi ma matua. A o le i ai i inei, e tele lava le eseese.

Lau Afioga i le Fofoga Fetalai, o le taua lena o le mataupu lea ua oo i ai le Minisita, leaga e tele naunau faafitauli o le mafaufau lea e le o manatunatu i ai matua i le tele o taimi. Faafitauli e tupu ae i le mafaufau o fanau i le toesea atu ma Samoa nei, sa mafuta ma matua i le tele o tausaga, a o lea ua te i lava ua nonofo eseese. E i ai manatu ua tutupu faapena i fanau ia na maliliu mai ua pule i o latou soifua. O le ala foi la lena na sui atoa ai le faaiuga a le tatou Komiti o Faalavelave Faafuasei ona ua amata ona maua mai lipoti i mea ua tutupu i a tatou fanau i le nonofo, nonofo nonofo na o latou i totonu o potu, a o lea na matua fai ai lava le faiga faapitoa o le faalele o le vaalele e aumai tatou fanau mai Saina, aumai tatou fanau mai Iapani, faasolosolo ane ai i Ausetalia, a o lea e mafiafia ai le mai o le Koviti. O lea foi ua agai atu aua ua oo foi i tagata matutua o lo o i fafo, aemaise fo i latou lea sa o e tautua i galuega o alii leoleo i galuega o le filemu, ma latou na ave i le Malo o Initia ma nisi foi o fanau i galuega faamisionare i Aferika. O lea ua taua tele i le tatou Malo. Masalo a tuu i le Pasefika, lea ua outou faafogafoga atu i Tutuila e oo mai nei o la e taofi lava le malaga mai ae ese ai la tatou. O tatou ua ova ma le 4,000 o tatou tagata e aumai mai fafo. O le ala foi la lena e faamalie ai ia i latou i le faigata o puipuiga ia e fai, o puipuiga ina ia aloaia lelei ia aua ne i omai ma se mai, a ia omai faataunuu le mafutaga ma matua ua leva ona toesea.

Lau Afioga i le Fofoga Fetalai, o le toe faaopoopo atu lea i le saunoaga faamalamalama a le Afioga i le Minisita.

**FOFOGA FETALAI:** Malo. Manaia le faamalamalama a lau Afioga. Faafetai. Ia, tulai maia lau Afioga i le Minisita, lau Afioga i le Toetaufanua a le Malietoa.

**Afioga Hon LOAU SOLAMALEMALO KENETI SIO:** Faafetai i lau Afioga i le Fofoga Fetalai, faafetai foi mo le fesoasoani mai a le Afioga i le Taitai o le Malo ina ia matua malamalama le tulaga lea faamalamalama. Aua e pei ona ou fai atu, e le faigofie, e tele ona faafitauli, ma o lo o taumafai lava ina ia fapena ona faaatoatoa le auaunaga. Ua tatou talanoa foi i le Iunivesite i lenei taimi, ioe. O lea ua taua, aua e lauga soo lava foi ma talanoa i ai. O le agaga lena, o le aoaoina o tatou fanau i Samoa nei. Ua faapena foi ona salalau tala i le tulaga ua oo i ai le tatou USP foi lea i Fiti e pei ona i ai le fetuunaiga i lenei taimi. Ua le o toe po malae i le faafofogaaga a Samoa, ua alu i nusipepa ma alaleo le tulaga e pei ona i ai



le tatou Iunivesite. Ia, o fuafuaga ia, aua a faapea e tapuni le tatou Iunivesite o le Pasefika a o la e i ai lava le tatou Iunivesite e faapena ona aoaoina ai alo ma fanau. O lea la ua i ai fuafuaga, o lo o i ai faafitauli ia o lo o tau fofo lava i le taimi lenei i le va ai o le Malo o Fiti ma le Counsel a le tatou Iunivesite o le USP. Ia talosia ia ia taulu taulu tau lau ma faapena ona fofo i se tulaga ia mafai ai ona toe amata lelei ma toe faaauau tulaga o le tatou USP. E matau foi o lea ua siitia mai le igoa o le tatou aoga lea o le Iunivesite o le Pasefika sa i gauta i Alafua, ua uma ona toe launch ma faaigoaina, ua le toe faaigoaina la o le Iunivesite o le Pasefika i Alafua, a o le lala o le Iunivesite o le Pasefika i Samoa, lea sa tatala talu ai nei. O lona naunautaiga, ia siitia ai foi, ia more recognized atu i lo le Iunivesite o le Pasefika. Ma ua tele foi isi polokalame o lo o faapena ona faagasolo ai. E taua foi le i ai o le Iunivesite lea ma maua ai foi isi polokalame ina ia siitia ai foi le auaunaga a le tatou Iunivesite ina ia faapena ona fai se tauvaga, ia faapena ona siitia ai ma oo ai i le tulaga o le naunautaiga ia faapena ona atamamai tatou alo ma fanau. Ia, o le a le toe tele se tala i ia tulaga lau Afioga i le Fofoga Fetalai, masalo ai ua manino fuafuaga uma.

O le tatou initaneti ma auaunaga faatekonolosi, ia e tele lava foi isi e faaoga lelei, ae i ai lava foi tagata e le faaogaina i se auala talafeagai ma avefa ai ma mea e sopoutu ai faamatalaga. Na sau lou afafine i le isi afiafi fai mai ia te au, dad, o lea o le a ou tago e fai sau page e like mai ai tagata ia oe, e aoga foi i lau palota. Ou fai atu lava lea i si ou afafine, ia ua lelei e leai se mea o i ai pe a faapea o se mea lelei. Ae te i ua aumai ia te au, sole, e matautia le mea alii lau Afioga i le Fofoga Fetalai. Ioe. Ua ou vaai atu i tagata la e like mai ia te au ua ova ma le 10 miliona. Ioe. A o le manaia ia o komeni a isi, comments foi nei. I love you Minister.

**FOFOGA FETALAI:** Se i tulai mai le Palemia pe le o lavea ai sana komeni i na.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ou te ma e fai atu le fesili lea ae o le a fai atu pea. Ou te faafesili atu a, o latou ia o lo o tau sue o latou tama i taimi sa e talavou ai ma e taalo lakapi ai?

**Afioga Hon LOAU SOLAMALEMALO KENETI SIO:** Ia, e leai e le o se talaole lau Afioga i le Fofoga Fetalai. Ia masalo lau Afioga e lavevea uma atu ai lava foi ma le... ae o le taua o le faaoga lelei e talanoa ai i nai au fanau la e i fafo, nai ou aiga. A o le tala lau Afioga i le Fofoga Fetalai, ou te ata la aua e omai lava komeni, love you babe, ioe. Ou faapea, auoo, e maua ai ma au i i... Ia, e sili le toe cancel o le page. Ae toe sau foi isi comments, sole, e dislike. Fai mai, Loau, lou mea le aoga... aivalea e te le

iloa se paupau. Ia ou ata lava lea. Ou faapea, e lelei toe leaga foi. O le mea lea, lou mea aivalea e te le iloa se paupau. Ia o ai e fia tilotilo i se paupau? O le mea lea, lau Afioga Faumui, leaga ou te faalogo atu fai mai le toeaina e te le iloa se paupau. Ia, e lelei foi le valea e te le iloa ai se paupau. Aua o ai e fia tilotilo i se paupau? E leaga atu ai le ai paupau. O le mea lea Faumui...

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai...

**FOFOGA FETALAI:** Ia, leaga o lea... ia po o le tulaga lea e fia faamanino po o ai o oulua e silafia le paupau pe...

**Afioga Hon Faumuina Tiatia Faaolatane Liuga:** Ia na ona ou fia faamalo i le Afioga i le Minisita, aua o le tulaga lea pei ona saunoa i ai le Minisita, lea na fetalai ai Iesu i ona soo, e leai se isi e sili ia Ioane le papatiso, seivagana lava le tagata e faamaulalo lava ia ia te ia. Le tagata lena e sili ia Ioane le papatiso. Ae leaga o lea na saunoa le Afioga i le Minisita, o lea e tau Faumuina. O la e faalogologo mai lou itumalo, o la e silafia e lou itumalo ua faafia ona soo le lalolagi ia te au ae ou te le iloa se paupau. Ia se i vaai i ai? Faasao le saunoaga a le Minisita po o ai o maua lea e faasino i ai lana saunoaga, leaga e le o malamalama. Ma lou faaloalo lava.

**Afioga Faumuina Asi Pauli Wayne Fong:** Lau Afoga i le Fofoga Fetalai a maua mai se manatu aumai se avanoa...

**FOFOGA FETALAI:** Malo faafetai. E faapena. E le faapea o se... o le saunoaga. A lea tatou te... A foi talu ai nei po ua tolu ea vaiaso o tatou le iugafono foi lele, ona toe ai lea o le Palemene. Ioe. E faapena.

**Afioga Faumuina Asi Pauli Wayne Fong:** E a e maua pea la se avanoa?

**FOFOGA FETALAI:** Ia manatua foi, o ananafi na lauga ai le faifeau i le TV 2 fai mai, e ese le manaia o tatou Fonotaga. Le Palemene, ou te le selu atu pe ou te vivii atu, ae pau lava lea o le mea, ia outou fealofani. E faapefea ona outou saunoa mai i le atunuu ia fealofani ae solomua i le Palemene o Taitai o le atunuu ona le fealofani? Ia o le mea lena ua ou manatu, se faauma ai loa i i le mataupu lena i le saunoaga a le faifeau ananafi. Ae ona o lea ua tatou taunuu... malie ia le sui usufono o lea ua tatou taunuu i le tatou malologa masani...

**Afioga Faumuina Asi Pauli Wayne Fong:** Faafetai lava i lau Afioga. Ia, tatou o ia i tua e talanoa ai. Faafetai lava.

**FOFOGA FETALAI:** Manaia. Ia o le a faataatiaese Galuega a le Fono Aoa mo lana malologa.

*Na faataatiaese Tualumaga a le Fono Aoa Faitulafono mo lana malologa masani i le itula e 10:40 i le taeao ma toe faaauau i le itula e 11:26 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.*

**FOFOGA FETALAI:** Ou te faasilasila atu ua toe amatalia Tualumaga ma Galuega a le Fono Aoa Faitulafono.

Ia, malo le onosai malo foi le usufono. E i ai le manatu ua faaopoopo foi le malosi e toe faaauau ai le tatou galuega. Masalo o le avanoa lenei ou te toe tapa ai ma le faaaloalo lau Afioga i le Minisita mo Aoga, Taaloga ma Aganuu e te tulai mai e faaauau le saunoaga.

**Afioga Hon LOAU SOLAMALEMALO KENETI SIO:** Faafetai atu i lau Afioga i le Fofoga Fetalai. E faalua le leo e pei ona e saunoa e ala foi i lenei itula o le aso, ua maea foi le taliga o le sua, palega auau le taliga o le sua, aua le faamalosiga ua maua le faasiligamalosi e faaauau ai a tatou galuega e pei o lo tatou valaauina.

E faia le faiga malologa o faapena foi ona talanoaina le taua o nisi o vaega e pei ona ou autalatala aua le Matagaluega. Ou te manatu foi lau Afioga i le Fofoga Fetalai, e gagaifo le la i le aso lenei e le uma lota fia tautala, ae ta te manumanu foi ne i pea mai ai ua ta sii se matalalaga ma ota toe nofo ai lava lea o ita ma vivii ita. A o le agaga moni, o le fia faamalamalama o fuafuaga aua le tulaga foi pei ona i ai lenei Matagaluega.

Ua oo se faamatalaga lau Afioga e pei ona i ai le aoaoina o tatou faiaoga e saunoa soo ai foi lava le Afioga i le Taitai ma afea i ana saunoaga le taua o le toe upgrade o tatou faiaoga i le isi level, e faapea foi ona oo i ai le latou aoaoina aua lava alo ma fanau.

E amata mai lenei polokalame, ae a fua i ai i le taimi lenei, ua 456 faiaoga ua faapena ona maua a latou tikeri po o Bachelors of Degrees ua faapena ona maua i le taimi lenei. Sa diploma, o le tele o nai isi faiaoga sa certificate, a o lea ua siisii atu i luga i degrees tomai ma le agavaa o faiaoga e faapena ona aotauina ai alo ma fanau. O se tulaga lelei. Saunoa le Taitai,

o le taugata ia o lenei fuafuaga, e le taugofie, ae na taumafai lava le tatou Malo ina ia oooo lava le auauunaga ma faapena ona lava taoso a tatou faiaoga i le tulaga lea.

Lau Afioga i le Fofoga Fetalai, o le isi vaega e aafia i lalo o lau vaavaaiga foi o le tatou aganuu. O tu ma aga e aotauina i totonu o aoaoga ina ia faapena ona iloa e le tamaitiiti lona faasinomaga, lana gagana, o le tu ma le aganuu. Ua matau foi o lea ua uma ona faataoto le fausiaina o le tatou maota tele lela, pe na ma le laina ua toe o se aga ona faamaea lea, ua saunoa foi i ai le Afioga i le Taitai. O le auga lava o aute, ia faapena ona apelepelea ma lava ni mea e tapenapena aua lava le tatou aganuu, e fai ai faafiafiaga a tamaiti ma teumalu ai a tatou measina. O le isi lea o fuafuaga o lo o faapena ona faataatitia aua le tatou maota tele lea i Malifa e fai ai le tatou culture centre. Toe lava o se aga ona faapena lea ona maea, ona e talu ai o le taofia pea o alavaa ma femalagaaiga, ua tataua ona toe foi mai nai tagatanuu Saina ia, o tagatanuu o Saina o lo o faapena ona o latou tapenaina lenei tulaga, mo le fausiaina o le tatou Culture Centre. E i ai le faamoemoe e pei ona lavasi ai foi ia se tasi o fuafuaga aupito sili ona taua o le tatou tusi faatonu upu. O le vaiaso lea na tea nei na faapena ona faauma ai le galuega a nai toeaia, talofa, i le la ma le laina i le tele o le galuega. O le faatonu upu o le upu faaperetania o le dictionary. E tuu uma ai i totonu upu Samoa ina ia aoaoina ai alo ma fanau. O lo tatou faasinomaga lea, o lau gagana ina ia sao ma atoatoa, lea la ua faapena ona tino mai le galuega lea. E toe lava o se vaega laititi o lo o faapena ona.... ona lolomi loa lea o le tatou tusi, o le faatonu upu o le Gagana Samoa, ona tufatufa atu foi i tua e faapena ona aoga ai ma aotauina ai alo ma fanau a si o tatou atunuu.

Ou te aveai ai e lenei taimi, ou te momoli atu ai le faafetai i le faatofalaiga a tupu ma ee a lo tatou atunuu. O Tama ma o latou Aiga o Aiga ma Tama, o lea ua aofia uma lava i i. O le usuga a Tumua ma Pule lea sa o latou tuufaatasia ia lenei tusi, e le faigofie le galuega. E le gata i lea o susuga i faafeagaiga, o tama malolo manumalo, o tamatai sa, o lea sa o latou tuufaatasia. Faafetai le galulue, faafetai le faatupu, faafetai le faatamalii. O se faamatalaga leaga o au foi e i ai le vaega o taaloga, o lo o i lalo o lau vaavaaiga. E tasi lea vaega taua o le aoaoina o alo ma fanau, o mea tau taaloga. E le o faapaela foi la outou silasila, o le 2019 sa faapena ona faataunuuina ai taaloga o le Pasefika i inei i le tatou atunuu. Ou te le tau fai atu, aua lea fuafuaga matagofie. O se taimi puupuu lava na fai ai le faaiuga talu ai, ona ua le mafai e se tasi o Malo o le Pasefika ona faatino lea tulaga. Ma aapa atu i ai aao mafola ma aao alofa o si o tatou atunuu, e laveai mai ia na i o tatou uso ia. O lea na ala ai ona faataunuu ia taaloga i totonu o si o tatou Malo. E masalo e silafia uma, le tulaga na i ai. E 27 taaloga sa faatinoina i lona aotelega. O lea foi sa tatou vaai i le taumafai a si o tatou atunuu ina ia tino mai. E le faapito la manu, e le faapito se faafetai i se isi.

E momoli ai le agaga faafetai i le faalogologo mai o le paia o le tatou atunuu i lena vaitau. I le talimalo, saafi, laumata fiafia, ina ia tino mai, lele le manu ma si ana ia. Toe foi a tatou malo ma le tala fiafia ma le tala aave i le talimalo a si o tatou atunuu, i ona vaega uma e le faapito. E matau i lena vaitaimi sa tau sue, po o fea a nonofo ai, ua fememeai. Ae a? Lea na tali mai le nuu paia i Fogaa, na tali mai. A o faafogafoga mai le Peresetene, le Peresetene o le Auso aemaise le nuu paia, le aufaigaluega tofofi a le Atua o lo o alalatai ai, na tali mai. Na tu mai i le taimi na manaomia ai e le tatou Malo se fesoasoani, Ia faafetai, faafetai i lo outou agaga saafi, faafetai le tautua Malo e ala i nofoaga. E pei lava ona silafia, na toloa lava le fonotele a le Ekalesia, ae se i tali a tatou Malo. O le agaga lea, e faaleo ai se agaga i le faafogafoga mai a le paia i le Ekalesia Metotisi, ia ua malie lau pule ua malie lau faaaloalo, faafetai le faatupu faafetai le faatamalii.

Ou te manatu lau Afioga i le Fofoga Fetalai, o le a seu i fanua lou sa. E le o toe tele foi se mea e oooo i ai se faamatalaga. A outou silasila mai i le tusi lenei, o le tusi lenei o le Education Sector Plan 2019-2024. O fuafuaga ua uma ona faataatitia mo le agai a le Matagaluega o Aoga, po o le Itupaepae o Aoga, Education Sector Plan. E le gata ai la i i, o lea ua uma ona amata i le 2019, 2020 ia ma faasolo atu ai lava. O lona uiga e tataua ona ou toe sau e faaauau le mea lenei. Ia ae leai se isi e fai loto, afai e uma lava nei ma faatofa atu ai, e leai se tala e faia. A o le agaga lea o le tusi lea, ua i ai uma i totonu fuafuaga alualu mamao. A fia maua sau tusi, ona e afio mai lea ma tala mai aao, e aoga foi e te alu ma oe.

**FOFOGA FETALAI:** Ia malie lau Afioga, o lea ua...ona e te le i saunoa i le tusi lea lau Afioga. A o lea ua e tulai mai, a o le tusi lea ua oo i ai le saunoaga.

**Tofa Lealailepule Rimoni Aiafi (Faleata Sisifo):** E puupuu lava le fesili, o le tusi tonu lava lea lau Afioga, leaga o lea e pei o lea ou te vaai atu i ai, o lea e i ai le SQA, ae le i oo i ai le Afioga i le Minisita. E tasi lava le fesili. Aua o lea o le a toe foi mai e faaauau lana galuega, ona o le SQA mo le tilotilo agai i luma. Ona o lea e pei o le latou manulauti lea e i ai o Post Secondary, e na o tagata matutua ua iu mai. Ae ou te talitonu e tataua ona aveese mai i le Matagaluega o Aoga le function lea, ae faatino e latou, e amata atu i lalo i pre-schoo, primary school seia oo i luga, o le aano tonu lea o le taua lea o aoaoga. Ma le faaaloalo lava.

**FOFOGA FETALAI:** E manaia foi le fautuaga. Ae se i... aua e mautinoa lava e te Minisita pe a e toe...aua e leai sau palota leai sau palota pe a toe taliu mai. Tulai mai lau Afioga i le Minisita o Aoga, faaiu mai lau saunoaga i lau tusi.

**Afioga Hon LOAU SOLAMALEMALO KENETI SIO:** E taua le finagalo faaalua, ae o lea o le a faamauina lau Afioga, e toe silasila i ai, e taua e le o se mea leaga. E taua e matimati ai, a lelei faaaoga e le o se leaga lea tulaga. O lea foi e ia te au results o le Samoa School Leaving Certificate, ma le Samoa School Certificate, lea ou te uu atua. Se e matautia le atamamai o tamaiti, vaai togi sole, Samoa College oi tafefe, o le atamamai. E tai 90+ ia maka o tamaiti, ae e le na o Samoa College la, o aoga uma. O Maluafou college, o la ...e matautia. O foliga vaaia ia, o le alualu i luma o le tomai ma agavaa o faiaoga e aoaoina alo ma fanau. A e fia maua se kopi susu ane i le Ofisa o Aoga e avatu e te silasila i ai, o mea ua uma ona faamauina. O le atamamai o alo ma fanau o si o tatou atunuu.

Ona ou manatu lea lau Afioga i le Fofoga Fetalai, o le a sisi le pasina a le tautai. Ua matau o lea ua goto le igafo i lona alititai i lenei itula o le aso. Ona manatu lea o le a sisi le lafala ae ou faasee i le malu o le tai taeao. Ae ao lava ona ou afe, aua le faafofoga tapuai mai a si ou itumalo. O le mea lea, o au le isi itumalo, o lea ua i ai suiga fou ia. Ua vavae, ona o fuafuaga o le vaai mamao a lo tatou Malo i le mea e talafeagai. Sagaga i le Falefa i le taimi nei, a o le isi faiga palota, ua Sagaga Nu 1 matou, ae Sagaga Nu 4 ia Saleimoa. O le mea lea, Luatua ma lou Gautaala, a o faafofoga mai le Faletolu, le paia i aiga e tolu. Ua tau le maua foi se tala e faaleo ai le agaga faafetai. Malo le tapuai, sa ou ula i lau ulafala manogi, aua le Palemene. Malo le tapuai faafetai le faatupu. E ui lava ua vaeluaina i tatou, aua ia o oe lava o le uso tuofe. Ma e le galo Afia i si ona vao, afe ane, afe ifo Luatua ma lou Gautaala. Ou afe mai i si ou itumalo aemaise o si ou nuu i Faleula. Aua le paia i le Toetaufanua ma alo o le Malietoa Maopu ma Tapunuu, lau fetalaiga Laupa, ma le mamalu o le Faletolu, malo le tapuai, faafetai tatalo. Aemaise o na i ou faoaaai, si ou nuu pele o Aele. Aele o le pese lava a Avele e le galo oe Avele, a o le tala a Loau, e le galo oe Aele, e manatua pea oe i le loto, aua le susu o le susuga i le faafeagaiga, le toa-fa o alii ma le toa-lua o tulafale ma le mamalu o le saofaiga. E faapena foi si ou pitonuu o Nu, o le nuu paia, o le nuu lena o lea ua faapena ona nopiai ai Samoa i Nu. O lou faalagiga o Aiga ma Tama o Tama ma o latou Aiga. Ae a le usuga a Tumua ma Pule, se taimi afe atu tatou talanoa fai se tatou faalupega lelei.

O lenei taimi, tapuai faafetai aemaise o si ou faoaaai po o si ou pitonuu i Tafaigata. O lea ua uma ona to atu lo outou matupalapala Tafaigata. E pau lenei o le afioaga e le i nofoia eleele a o la ua fai le latou faleaoga. Ina ia faapena ona aotauina ai alo ma fanau e pei ona faaigoa ai o le Saint Pauls Academy. Na liua mai le tama o Saulo ia Paulo ua le o toe Saulo. Na liua le ogaeleele sa faapena ona faasala ai e o lo o nofosala, ua liua e aoaoina ai ma puna ai le punavai o le aotauina o alo ma fanau, faafetai le tapuai malo le tatalo.

E le faagaloina le tapuaiga a le nuu paia i le Afioga i le Peresetene ma le Peresetene o le Auso ma le au paia, le afaigaluega tofofi. O lea ua tatou nutimea faatasi, o outou o alala i Fogaa, o le a foi se tautua le auau a Loau ma le nuu, malu ave i fale le paia o le afaigaluega. Faafetai tatalo, faafetai le tapuai. Le paia i le toeaina ma faifeau o si o matou nuu, le susuga i le Peresetene o le AOG, lau susuga Tavita Pagaialii, e tele ina ta feiloai ma aumai foi au faamanuiaga, sau tuualalo aua foi se faamatalaga e aoao tetele ai, faafetai tele le tapuai faafetai le timai.

O le tala lea lau Afioga i le Fofoga Fetalai, ua seu i fanua le sa. A tuuama foi le fua ma taape le filialii i lenei aso, ia folau i lagima le paia i le Maota nei.

Ne i galo Afia i si ona vaa, lau Afioga i le Fofoga Fetalai, o oe lava e tama atu i ai, o lea foi ua maua o le a seu i fanua le faatamasoaliiga a lau Afioga, malo le tautai faafetai tautua. Aemaise o na i ou tama o lea foi e matau atu o le a faapena ona malolo manumalo, ia maua lo outou malosi.

Ona ou aapa lea, ne i galo le piitaga aua le afaigaluega. O lea e matau atu le afio mai o le Ofisa Sili le tama a le Laaunafausia. Sole, e ese le popoto o tagata o lenei nuu o Fasitoo. O le Palemia o le Fasitoo, Fofoga Fetalai o le Fasitoo, a o lea foi e Pule Sili le Fasitoo i le NUS, tama tau Fasitoo, faafetai le galue. You are my man. Le SQA faafetai le galue i le tamaitai Ofisa Sili o Pulega, malo le galue aemaise o lou auvaa and you are my girl. Aemaise ai o le afioga ia Afamasaga o le polofesa le mea alii... aua le ula i ai se isi, o le polofesa le mea. Faafetai Afamasaga malie le faaaloalo, faafetai le tautua atunuu. E faigata oe na e tofitofia Malo, matua ma le usoalii aua le Falefitu ma upu i le fale Fasitoo. Ua malie le faaaloalo aua le ta galulue ai. Afamasaga, you are my mother. Le paia i le tatou afaigaluega, tatou feiloai pea, e masalo o Aperila e uma ai lou soifua...malo le tautua.

Ia ua uma upu a le tamaloa Fogaa, ia agalelei le Atua i toega o lenei aso, a o lea o le a olioli atu le soata, aua lou uso ia Faaolesa. Ia faafetai tele mo le avanoa. Manuia le usugafono.

*Na faaalua le agaga fiafia o le Palemene i le patipati o latou aao i le maea ai o le saunoaga talifuaitau a le Minisita mo Aoga, Taaloga ma Aganuu.*

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e i ai nai mataupu ia e taua tele na oo i ai le saunoaga taufaaiuiui a le Minisita. Sa ou taumafai lava e fautuaina au Mainisita. A oo loa i mea tau.... e aafia ai lou tina, avane i tua i se tusi, ae le o le tau aumai i luma. E i

ai le itu taua lenei, leaga ua o se mataupu ua faapaia mata. Lea na oo i ai le Afioga i le Minisita, o tuaoi palota i itumalo. E masalo o se avanoa lelei lenei e toe faamalamalama atili ai le mataupu lea, leaga e tau mai i le taimi lenei, o lo o avea pea ma mataupu faapaia mata, i nisi o itumalo, ona o le sese o le faauigaina. O le tulaga na toe fetuunai ai ia tuaoi palota o itumalo, e le o toe na ma le laina. O le mataupu lenei sa avea ma mataupu e lagalaga ai finagalo i totonu o le Maota lenei. E mai lava i le taimi na avea ai au ma faipule. Ma sa tau saili se fofo, e mai lava i na taimi, po o le a se fofo, e fofo ai le tupu pea tupu pea o le faitau aofai, i lea itumalo palota ma lea itumalo palota, ae tasi lo latou faipule. Ma e le mafai ona alofia leaga o le itu taua tele le itu lea. E tupu i Samoa, e tupu i Amerika, e tupu i Peretania. O le ala foi lena e ala ai ona vaevae Maota i Maota e lua, e faalua i Amerika. E ese le Maota maualuga o le Senate, e tumau le aofai o sui i le tai-lua mai le itumalo. A o lea e silafia e 50 itumalo po o Setete. E na o le tailua lava sui. O le uiga o le lua, ina ia faatutusa uma ai ia itumalo, pe a oo i mataupu e aumai i totonu e pasia e le Senate. Ae a oo...ae i ai la isi Maota o le Maota o sui, e fua la i le toatele o le aofai o tagata o se itumalo. O lona uiga, o le mea lea e lagalaga e Samoa i nisi o faipule, e sao lelei, leaga e afaina ai ia o latou representation i totonu o le Maota lenei. E le taitai ona talafeagai le malosi o le toatele o tagata o le isi itumalo, ae toa laititi tagata o le isi itumalo, ae taitasi lava sui e omai i totonu o le Maota. E tatau la ona ave se faataua i le itumalo e toatele tagata. Aisea? Leaga e tele le latou aia, leaga e toatele i latou. O le a la le fofo na fai e Palemene i na ona aso. Ia faaaoga loa le valivali pou e vali ai le pou, ae le mafai ona tape ai le pou. E i ai lava, o le a ola pea le mata e le mafai ona pe. O le a la le valivaliga o le pou lea sa valivali pou ai. O le siitia loa o nisi ituamlo e tailua o latou sui. O le lua lena o sui, sa ave ai foi ma le aia tatau i le tagata palota e 2 foi ana palota e fai. Ua sau sau le tulaga lena, ua le malie, i itumalo ia e taitasi o latou sui, e tasi foi le tagata tasi foi le palota. O le mataupu la lena, ua leva ona taoto sa tau saili se fofo. O le ala lena o lea na agai ai loa le Faigamalo lenei, e saili se fofo mautu. Ona tilotilo loa lea i tu ma aga o lo o faia e atunuu, na mafua mai ai lenei mea o faiga palota, aua e le o se tatou mea, o le mea mai fafo. Na tatou taumafai e saili, le fofo o mea nei mai fafo e faaaoga ai fofo faafafo. O lea la sa tatou tapa ai loa ia se fautuaga, e aumai i nisi, e pei o le Malo o Niu Sila. O le Malo o Niu Sila, e matua malosi lava i le mea lea o le fetuunaiga o tuaoi, e tau tali ai i le faafitauli lea. O le faafitauli lea e fitoitonu lava i Faigamalo, e faapalota le filifiliga o latou sui. O lea la na maua mai ai le auala tatou te tilotilo i ai, galue ai loa le Ofisa o Faiga Palota. Tuu mai loa i le faatulagaga o itumalo, i le faatusatusaga o tatou tagata, ia foi i le Tulafono Sili. O nei mea o faiga palota ia taumafai ia i ai se amiotonu. O lea le uiga o lea upu ia i ai se amiotonu. O le a le uiga o lea upu, ia i ai se amiotonu? Ia i ai se amiotonu o le toatele o tagata ma sui i totonu o le Palemene. A ia ausia foi le tulaga



aupito amiotonu, tasi le itumalo, tasi lo latou sui, tasi le tagata palota, tasi lana palota. O le Tulafono lena faava-o-Malo i le itu o faiga palota. O le a la le mea lea na tatou faia, tatou liliu loa faatino faasolosolo. O le a talepe muamua tailua, ia le tailua ia sui i le taitasi. O lea la sa amata ia Safata faasolo mai ai lea i isi itumalo. E aofia ai ma Faasaleleaga, e aofia ai ma Falealili, aofia ai ma Salega, aofia ai foi ma le palota lea a latou tutu taitoatasi. O lea lava ua tatou iloa, it is not history, le tulaga vevesi na i ai Safata, faapea ane ai, o le a malepe le itumalo. O le faamatalaga a le Malo, e leai se mea o le a malepe ai fua le itumalo. O aga ia o faaiuga faale-Malo. A alu atu lava le iuga i mea ia, o mea faale-Malo e le aafia ai ia tulaga faale-aganuu.

Ona fai loa lea o le faataitaiga, silasila foi. O i i, i le nuu lea o Lalomanu, o lea e i ai le Ofisa o Leoleo, o le Ofisa lena o leoleo e cover ai ia itumalo, o Aleipata Itupa i luga, Aleipata Itupa i lalo, e aofia ai ma le itumalo o Lepa, e aofia ai ma le itumalo o Lotofaga. E faapena foi la i le falemai, o itumalo faale-Malo, itumalo faale-falemai, itumalo faaleoleo, sa i ai foi itumalo faafaatoaga. E tasi le ofisa ae cover uma ai Aleipata ma Lepa ma Lotofaga. Ma itumalo faapalota, e le o ni itumalo faale-aganuu. E manino manino lelei le faamalamalamaga. Lea na amata loa ona alu le sitepu muamua, ia faataitoatasi ia le itumalo, tasi lo latou sui. Uma loa le sitepu muamua see mai loa i le sitepu lona lua, toe faatulaga loa tuaoi faale-Malo, e le o ni tuaoi faale-aganuu. A oo loa la i faiga palota, o palota e le o ni mea masani ai. Ona faapena foi lea ona vaevae, ia itumalo se i tau faafetaui ia le aofai ia tau i ai sina faalaugatasia. E le mafai ona faalaugatasia atoatoa. Ae se i tau tuutuu mai i lalo, ina ia tau i ai si na tau paleni. E le faapea o atoa le paleni, ae ia i ai si na tau paleni. O le agaga lena, o lona uiga, o se tuaoi faapalota faale-itumalo e le tumau. O le a le uiga o le upu le tumau? A alualu foi, ua toatele ia e e fananau mai i le itumalo, toe toatele ai latou tagata palota, ona toe foi foi lea i le tuaoi tuai. O le upu lena na fai ia Saleaula, e le faapea o se mea tumau e oo lava i le faavavau. A oo lava ina toe fesoloai ia le aofai o tagata ona faapena lava lea. Ae pau lava le Tulafono sili, ia tau i ai si na faalaugatasia, a o fuainumera ma ave ese ai le mea lea sa vevesi ai le Palemene mai le 1962, seia tau mai lava ina ua faatino le faiga lea. O lea ua faatino e le Palemene lenei. O lea ua faatino, e tasi lea matatia faaopoopo atu i isi matatia, ua matatia le Nofoaiga lenei. Ma o le Nofoaiga e alu i le Tala Faasolopito le tetele o mea ia ua fai ai. Sa le mafaia e Nofoaiga i aso ua tuanai, ona fai se fofo. A o lea ua fai e le Nofoaiga lenei. Lau Afioga i le Fofoga Fetalai, o le faamalamalamaga lena. O le ala lena na ou fai ai ia Saleaula, e le faapea o se tuaoi tumau. O le tuaoi e fetuunai, e fetuunai, e fetalai. O le a foi le upu e masani ai tatou, o le uta a le poto e fetalai, o le uta se i tulou lava, o le uta a le vale o le taofiofi mamau. O lea la e fetalai le tofa i le Nofoaiga lenei. A matau mai la i le faipea faipea o se tuuaiga sese aemaise o tuaoi na faataoto i lalo, o i

ai uma le toa-lua lea e pisapisao nei i le iuga na fai e le Kapeneta, ae toe alu atu i fafo fai se faamatalaga sese.

Lau Afioga o le tulaga lena, e le faapea o se faaiuga ua tumau, a o se faaiuga e fetalai. A alu alu foi ua toe faatulaga atu, ua toatele le itumalo ae ua sili atu nai lo o le mea na i ai, i le tulaga lava lea o le taumafai ina ia faalaugatasia ia itumalo, ona faapea loa lea ona toe foi i le tuaoi faapalota faale-Malo, tuaoi faale-Malo. Ae e le avesea lava tulaga o le aganuu ia, ma o Saleaula, o le Pule faavae. Ia ma lana matafaioi o le Pule faavae.

O le ala lena o lea ou te matau ai, i le malosi o le feau na aumai a Saleaula, “Tuu loa, tuu loa”. Tuu le a? Tuu le taufaasese, o la lava e malamalama Saleaula, malamalama uma le atunuu atoa. E te fiu lava la e faatupu se taufaasese, e le mafai, e faapefea ona taufaasese o lea e nofo le sui usufono lea e alaala i totonu o le Maota lena le sui usufono o Saleaula. E faapefea ona e taufaasese o la e tamoe le sui o Saleaula i le taimi lena i le faiga palota o le a tatou agai atu i ai.

Lau Afioga i le Fofoga Fetalai, o le mea lena o le tau atu o se mea sese, a la e iloa uma lava e le atunuu le matua sese o le faamatalaga, o le matua pepelo le mafaufau.

Lau Afioga i le Fofoga Fetalai, o le taua lena o lou toe tulai atu, faamalamalama lelei tuaoi palota tuaoi faale-Malo, e ese ai ma tuaoi faale-aganuu. O tuaoi ua faataoto e le Malo i ana Faiga Faavae faale-Malo, palota, leoleo, falemai, tulaga masani, mai lava anamua ina faatoa omai papalagi ma latou faataoto ia tuaoi e galulue ai tulaga faale-Malo.

**FOFOGA FETALAI:** Malo, ia tulai maia le Minisita e faaiu mai le saunoaga. Oi ua uma, ia lelei. Ia e faapena, aua o lea foi ou te tofotofoina le Minisita pe i ai se isi mea o totoe. Ia a lea la ua ia, malo faafetai.

E le tauilo leaga o lea lava na e saunoa ioe, e uma loa ia tauga lapalapa a toa o le atunuu, i le amotai ma le amouta ma le toe aso nai Moamoa ia fusufusi loa lapalapa o Malo ae momoli i Fogaa. Momoli tonu lava i le mea lena e te afio ai, malo, e le tau laeia aua o le tala malamalama e faapena ona taoto i ai Malo ma e momoli foi i ai malo.

Ia talosia ia, ia logosaia i le faafofoga mai a le itumalo, se i toe tuu mai lava se i e toe sau lava se i faauma le tusi lena. Ioe, ia e pei e faapena se lagona, maumau e pe ana faapea ou te malolo ae ou palota ia oe ou te toe palota ia oe. Ui i lea, ia faamoemoe i le Atua, ia see atu ia le faasologa o saunoaga a Minisita, i le Minisita o Faiga Palota ma Faamasinoga.

Ia tulai maia lau Afioga i le Minisita e saunoa.

**Afioga Hon FAAOLESA KATOPAU T AINUU (Minisita o Faamasinoga ma Pulega Tau Faamasinoga & Komisi o Faiga Palota):** Lau Afioga i le Fofoga Fetalai, ua tatou tulata nei i taulaumea o faigamea. E ui ina tagutugutu le ala sa o tatou ae ai i le ti, ae ifo le nonu, ae Viia Le

Atua, ua o tatou taunuu ifo i le laulelei i le ala i fuiono. Faamalo le onosai, o lea ua ifo nei le seuga, le lupe sa faalele o lea ua tulima, tu i lona tula.

Ae o le agaga o le faafetai, e tusa ma le tatou mafutaga o lea ua mafanafana, aua se auaunaga ia Samoa. Ou te faatalofa ma ofo alofa atu i le Afio o lau Afioga i le Fofoga o le Fono, afio lau Afioga i le Taitai o le Maota, lau Afioga i le Palemia, Kapeneta ma Minisita Lagolago. Faatalofa atu foi i lona Itu o le Maota, Taitaifono ma Sui Taitaifono Komiti Faa-Palemene, ma sui usufono o le Maota o Samoa. Ou te faatalofa atu i lenei itula i le tapuaiga mamalu a le Ao o Le Malo ma le Masiofo, le Sui o le Fono a Sui Tofia ia ma le faletua, faapea le Faamasino Sili, Peresetene ma le mamalu o le Faamasinoga.

E le galo foi le nofo tatalo mai a le aufaigaluega a le Atua i fata faitaulaga e fia o lo o nono manu aua se manuia o Samoa.

O paia faale-aganuu i le usoga a Tumua ma Pule, Ituau ma Alataua, Aiga i le Tai ma le Vaa o Fonoti, o Tama ma o latou Aiga, Aiga o Nofo, Aiga o Tupu, Aiga o Papa, Aiga Tafaifa.

E le faagaloina le tapuaiga a le Motu i Sasae, aua le faasuaga ma nofo, nofo a Maopu, ma le mamalu i le Faleagafulu. O le paia lava lea ia Sua ma le Vaifanua, Fofu ma Aitulagi, Ituau ma Alataua, Saole ma le Launiu na Saelua, Faatui o le motu, Tootoo o le Faleula, ma Upu ia te oe le Manuatele.

E fia faalelele o le agaga o le faafetai i lau Afioga i le Fofoga Fetalai, lau Afioga Leaupepe Toleafoa Faafisi, i galuega fita o feagai ma oe aua le Fonousu a Samoa. Faamalo le onosai, faamalo le faapalepale. O lea ua maua atu, o le a seu i fanua le sa o le tautai matapalapala, faapea foi tama matutua, lauao sinasina. Lau Afioga Aeau Peniamina Leavai, Faasootauloa Pati faapea le Afioga ia Tuitama Leao Dr Talalelei Tuitama. Faafetai i lo tou sao taua ia Samoa, ma ona upufai, ia agalelei pea le Atua aua le faamoemoe o nisi valaauina, o le Atua mo outou.

Faafetai i Ofisa Sili o Pulega o Faalapotopotoga Tumaoti o le tatou Malo, i la outou tautua matavela. O outou o lo o tua i ai le Malo i le faatinoga o galuega. Faafetai le talimano, e faapito augafa i le Failautusi o le Fono o le Ofisa o le Fono i la outou galuega faifaiepa o le tautuaina o le Fonousu a Samoa. Faamalo le tauatai, faamalo le onosai.

E le faagaloina uso sui usufono ua asiase mai i ai le tatou Matai Sili, e leai se fai loto aua e tatou te le taumasina i le finagalo o le Silisili Ese. Ae faafetai i ana meaalofo, e ala mai i ana auauna sa o tatou mafuta. O lo la sao ia Samoa ma ona tagata, e le faagaloina ai le Tofa ia Pau Sefo Pau, faapea le Afioga ia Toleafoa Vaafusuaga Ken Toleafoa.

E faafeiloai atu i le tapuaiga a si ou itumalo faaalaalafaga o Vaimauga i Sisifo Nu.2, i le Afio o Alosina ia Seumanutafa ma Toomalatai, faapea fuafuale o Salevalasi ia Tamaseu ma Faualo, faapea le Matua ia Faolesa ma Onofiatele. E le vaea foi le falaooto i le Afifio o Usoalii ia Tupuola ma

Siligatusa ma Faumuina, tainane le Afifio Matua ia Leupolu, ma Tuisaula ma le Aiga Samalietoa, aemaise le tausiga i le Faletolu ia Tuiletufuga, Letaa, Pupualii faapea le Vainalepa ma upu ia te oe Tuisamau. Faapea le loaloa ma le paia, o le paia ma le mamalu o Samoa, o Tupu ma Ee, o lo o afifio ma papaaao i fuaiuala eseese, o lo tatou itumalo. Faafetai i la outou pule, lea ou te tiu ai nei, faafetai mo le amanaia, faafetai mo fautuaga na tuuina mai, faafetai i la outou tapuaiga ma le onosaia, o ni vaivaiga o lo outou sui usufono.

Ae ou te fia faailoa atu se ootoga o galuega ua mafai ona finauina, ma lagolago i ai ia tou sui usufono, i faaiuga fai a le Kapeneta, mo le faatinoina o nei poloketi i totonu o itumalo faalaalafaga o Vaimauga Sisifo Nu.2. Muamua, o le finauina ma le fausiaina o talivai i le afioaga o Alaoa, Alaoa Dam, lea o le a faatino. Sa faatalanoaina leni atinae a o avea au ma Taitaifono o le Komiti Faatonu o le EPC po o le Faalapotopotoga o Malosiaga Faaletise, ona o inisinia a le EPC, sa taulamua i le tapenaina o lea poloketi.

O le faanaunautaiga, ia fesoasoani tele leni atinae poloketi i le tapueina o suavai. Faaitiitia ai le tafe o magavai, lea e mafua ai lologa i talafatai i Apia, ma nuu tulalata i le taulaga o Apia. O leni atinae, ua maea pasia e leni Paeaiga, i lona tau e \$100 miliona Amerika. Ma o lea tupe tele, o se meaalofa, grant mai ia tatou paaga.

2, Faamafua le fausia o le Faleaoga fou o le Apia Primary School, ua pasia ma faamaonia e le Paeaiga nei, e faatino ai lea galuega i le tausaga nei, pe a maea tapu o le Koviti. 3, Lagolagoina ia le fausiaina o le Falemataaga o Measina a Samoa i Malifa, National Museum and Culture Centre. 4, Lagolago mo le faaleleia, mo le faamatagofie o talafatai o le taulaga i Apia, Apia Waterfront Project. 5 Lagolago le fausia o le Vaisigano Bridge, lea ua maea ona tatalaina. 6 Lagolagoina le fausia o le alasima o le Lotosamasoni lea ua faaaogaina nei. 7 Lagolagoina ma uunaia le fausia o talivai i autafa o le vaitafe i Vaisigano mo le puipuia o le saogalemu i vaitaimi o lologa ma tafega. 8 Talosaga ma ua faamaonia le faatinoina o le suesuega ina ia foia lologa i le aai o Apia e afua mai i Malifa, agai atu i le vaipe o Tauese. 9 Finau mo le faaleleia o aualatele i Palisi lea ua maea ona tatalaina. E momoli atu ai le faafetai tele a le Malo mo atinae ua faatino, faapea ma atinae ua faamaonia o le a faia i lou itumalo.

Ona oo mai lea o sau faamatalaga i le Pati o le HRPP ma le tamaoaiga o Samoa. E le faigofie le tauasaina mai e le Malo aemaise le tamaoaiga o Samoa. E tele luitau sa feagai ma Faigamalo o le folauga a Samoa talu mai lona Tutoatasi i le 1962. Faataitaiga, faasee atu i Fiti o Ofisa Tutotonu o Faalapotopotoga o le Lalolagi, e pei o le Ofisa Tutotonu o le Malo Afaatasi faapea le Iunivesite o le Pasefika...

**FOFOGA FETALAI:** Ia, ou te fautuaina le saunoaga a lau Afioga, ia o le tele lava o mea ua maea saunoa faamanino ai le Afioga i le Taitai o le Malo. Ia ae manatu ioe, o le lotoifale lava ia faale-Kapeneta e faapena. Ia e le tau fautuaina foi e le matapia le manaia, e le faatutusaina foi ia saunoaga a tou Afioga i saunoaga a sui usufono. Leaga o outou e 2 pulou na i ai o le Palemene ma le Pule Faatonu.

O lea la e te saunoa faapule faatonu i le Kapeneta, e talifuaitea i mea sa laga e le mamalu, ia ma nisi o mea e faamalamalama sa laga e faapena. Ia e na ona ou faamanatu atu, ioe, e ese le saunoaga a le sui usufono o le Palemene, fesiligia mea sa laga... i o latou itumalo. A outou, ia tou te le toe faafetaia lava e outou le anoanoai o outou galauega na e fai. O lea ua manuia Samoa, o ai? O galuega faapule faatonu, o galuega a le Kapeneta, ia e na ona faamanatu atu, e faapena ne i e toe ae lelei o lena e manaia le saunoaga, ae faapuupu mai.

**Afioga Hon FAAOLESA KATOPAU T AINUU:** Itumalo lau Afioga i mea na fai ae o le a faia lou finagalo. Ae ua mafua ona toe o ese nei Faalapotopotoga, o le feeseeseaiga ma le Malo i lena vaitau. O le taimi tonu lea o tulai mai ia le Palemia o Samoa. Ae o le luitau e ogaoga i Tala Faasolopito o le Malo, o le tetee lea o tagata faigaluega a le Malo i le 1981 PSA, le taimi lea o tulai mai le Afioga ia Tupuola Efi i le tofi Palemia, po o le Afioga foi ia Tuiatua Tamasese Efi.

Ua ala la ona ou faataua lenei mea lau Afioga, ona o le taimi tonu lea sa tulai mai ai le HRPP, i le maea ai o le suiga faa-3 i le 1982. Aua e talitonu lou sui usufono o le tali lea a le Atua mo Samoa i le tulai mai o le HRPP. E pei o le tali a Nafanua, tali i lagi sou Malo'. O lona uiga, o le Faigamalo lenei a le HRPP, na valoia. A matau la i ai i le faagasologa o le tamaoiga i lalo o le HRPP, e le i toe foi lava i tua pe solomuli le tamaoiga o Samoa.

E moni sa i ai luitau ona o mala faale-natura ma aafiaga mai i fafo, ae e le i i ai se faapea ua oge taumafa Samoa. Aisea? Ona o le lelei faafoe ma le mautu o faiga faavae o faatinoga i le Faigamalo lenei a le HRPP. Talimano soifua lelei o tagata, talimano i le puipuiga o le saogalemu o tagata, talimano faava-o-Malo Faalapotopotoga i fafo o lo o lelei faafoe faiga faavae tau tupe, ma le aputiputi o ala manuia fou e maua aua aso faigata.

O le la ua o tatou silasila i ai, na amata mai i le utiuti o taumafa, ma tau faasoaso patuamoa i le 1981, seia oo mai i le taimi nei, i le tele o gasegase, ona ua tele taumafa.

**FOFOGA FETALAI:** Ia o le ala lea o lou fesoasoani atu, lau Afioga i le sui usufono mamalu, e ia te au foi le faaeteetega ne i molia i le malu o le tai taeao le Fofoga Fetalai ua ou aia i le tou galuega. Ia na ona fesoasoani atu i mea o lea ua... ogasami o lea ua asa mai e le Taitai o le Malo ia, nisi

foi o le Kapeneta ua faapena foi ona asaina lea ogasami, ia ae leaga o mea e aiga i le latou Matagaluega ia o lo o latou tausia.

Ioe, ae o mea ia e te saunoa ai e le aiga ma le tulaga lea e te... ae na ona ou faamanatu atu, ae fai lava ia lou finagalo. Leaga o le tatou galuega e fua i le tatou taimi. Ia se i tulai mai... ia e le afaina, faaalu pea lau galuega i te i ua faigata ona...

**Afioga Hon FAAOLESA KATOPAU T AINUU:** Ua faautiuti ia le taimi o matou nei e toa-3 ona ua umi tele ia le... ia ae...

**FOFOGA FETALAI:** Ia lelei, lelei faaauau le saunoaga a lau Afioga.

**Afioga Hon FAAOLESA KATOPAU T AINUU:** Ona oo mai lea o lau faafetai i le Taitai o le Malo, le Afioga i le Palemia, aua o ia lea ua toomaga i ai atunuu o le Pasefika, Niu Sila ma Ausetalia, mo ana fautuaga, taiala.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ia taatia maia le mea lena a tatou. Ia agai loa i lau Matagaluega.

**FOFOGA FETALAI:** Ia, se i...

**Afioga Hon FAAOLESA KATOPAU T AINUU:** O lea la ua feseai le lauga lau Afioga, onosai mai, onosai mai....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E ala ona ou tulai atu lau Afioga i le Fofoga Fetalai...

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E i ai le Afioga foi lea a le Atua e tatou te talanoa ai, ‘Aua ne i ia i tatou, aua ne i ia i tatou, a ia i Le Atua le Viiga’. O le ala lena o lea ou te fautua atu ai, agai loa i le... ne i te i... ua faapea o ou fiafia i ai, ae matua tumu i lou inoino i ai.

**FOFOGA FETALAI:** Ia e pei o itu ia, o itu ia leaga tou te le i 30 tausaga tou te le i mafuta i le Taitai o le Malo, e pau lava lenei o le Taitai e le manao i ni viiga. Ioe, e pau lea o le mea ia o tatou galulue, tatou galulue e tautala galuega. Malaga mai faatupu Iesu i luga o le asini, tau vavao e

tagata e Ioane le Papatiso ia aua le alalaga, ae fai mai leai tuu tagata e alalaga, aua a le alalaga mai tagata, e alalaga mai papa ma maa. Ioe, alalaga mai i galuega ma le tamaoaiga lea e i ai.

O lea e tatou te iloa e le tau fesiligia lena mea. O le mea la lea, ia aua ne i ia te i tatou, ae ia o tatou faapea ifo, o a mea lelei ua o tatou faia, foi le Viiga i Le Atua. E faapena, ae la e silafia e le atunuu, galuega lelei ua o tatou faia. Ia ua outou faia ona o outou o le Kapeneta.

**Tofa Olo Fiti Afoa Vaai:** Lau Afioga i le Fofoga Fetalai....

**FOFOGA FETALAI:** Ia e faamalie atu i le sui usufono, faamalie atu o lea ou te ave le fautuaga ma le fetuunaiga ma le Minisita. O le mea la lea, tulai mai le Minisita, e te le fautuaina le Minisita le sui usufono mamalu.

**Tofa Olo Fiti Afoa Vaai:** Se i fai atu po o ua maua ana pepa ona ou toe nofo lea i lalo.

**FOFOGA FETALAI:** Se malie le sui usufono e alaala mai i lalo, e faapena. O le sui usufono foi e i ai ona tofi i le Ekalesia le a foi... o le a foi lau Ekalesia Olo? Ia malo faafetai e ioe...faafetai.

Ia ua iloa foi o le mea e i ai le mamalu e i ai le filemu o le Alii.

**Tofa Olo Fiti Afoa Vaai:** Lau Afioga o le Ekalesia a Samoa.

**FOFOGA FETALAI:** Ia faafetai, se saunoa ia i lau Matagaluega lau Afioga i le Minisita.

**Afioga Hon FAAOLESA KATOPAU T AINUU:** Faamalulu atu i lau Afioga i le Fofoga Fetalai ona o le fesetai. Ona tatou oo mai lea i le Matagaluega a le Faamasinoga, o lea ua taoto faiga faavae, ma ua teuteu e le Matagaluega i lona aotelega. E aofia ai pulega lelei, tuuititia o soligatulafono, faaaogaina o metotia faa-tekonolosi, e faaleleia atili ai le auaunaga, aemaise le faatinoga lelei o le Faamasinoga o Fanua ma Suafa.

O nei teuteuga na faamafua mai i luitau sa faamauina i le taimi ua tuanai, i le faatinoga o galuega a le Matagaluega o Faamasinoga. O le a faaauau pea iloiloga o faiga faavae, e tali ai i manaoga ma luitau o le lumanai. E fia faamauina ai le agaga faafetai i le lala o Tulafono ma le amiotonu, Law and Justice Sector lea e Taitaifono ai le Resitala o Faamasinoga mo galuega maeaea i le faatinoina o tiute ma matafaioi moomia.

O le faatupeina o nei galuega o lo o fesoasoani malosi mai ai Malo o Ausetalia, Niu Sila, Iuni a Europa, Malo Tuufaatasi o Peretania, Suitiselani, aemaise Faalapotopotoga o Malo Aufaatasi, UNDP. Avea foi lenei avanoa e faamalo atu ai i le Afioga i le Faamasino Sili, ma le

Peresetene, Vasega o Faamasino. O la outou galuega faifaipea aua le sailia o le amiotonu. E le faigofie la outou pitolaau. Ae manuia mea uma i le faamoemoe i le musumusuga a le Agaga Paia. E fia faailoa lau faamalo ma le faafetai i le Resitala o le Faamasinoga ia Moliei Simi Vaai, ma le auaigaluega mo galuega lelei, o lo o faatinoina, o fuafua ma faataatia, mo le Matagaluega o Faamasinoga.

Ona oo mai lea o se faamatalaga i le Ofisa o Faiga Palota. O nisi nei o fuafuaga ausia e le Ofisa o Komesina o Faiga Palota i le Paeaiga lenei. Muamua, ua avea nei le Ofisa o le Komesina o Faiga Palota ma Ofisa Tumaoti, independent a le Malo. Ua mafai ona fai lea faiga i lalo o le Tulafono o Komesina o le Faiga Palota 2019. O lea fautuaga sa aumai i le Komisi Suesue, Commission of Enquiry e tele sa faapea ona gafa ma faiga palota e fia ua tuanai. 2, o le faamautuina o le talitonuga, one man, one vote.

Ua mafai ona faataunuina i lalo o le Tulafono o Itumalo Palota 2019, lea ua suia mai ai i itumalo faaalaalafaga, i itumalo faapalota e pei ona saunao i ai le Taitai o le Malo i le taeao nei, o le a faatino i lalo o le faiga palota tele ia Aperila 2021. 3, faaauau le faalauiloa faifaipea a le Ofisa o Faiga Palota i ala faasalalau e aofia ai aso faapitoa i tausaga taitasi ua faaigoina o le National Voter's Day. 4, e 2 palota laiti by-elections, sa mafai ona faatinoina i le Paeaiga lenei, ina ua maea le pasiga o Tulafono o Faiga Palota 2019.

O le matatia sa matauina o le leai o se palota, e tasi sa faaleaogaina. Ua mafua lea... i le lelei o le faataatia o faamatalaga i totonu o pepa palota fou. 5, o le vave lesitala o tagata palota, e amata mai lava ina ua maea le palota i le 2016, seia oo mai i le vaiaso mulimuli o le lesitala, i le tausaga na tea nei. Sa soo le atunuu i le faasavali a le Resitala e ui ina o tatou vaaia le lolofi mai o tagata, i le aso mulimuli o le tausaga na tea nei, ma e taua ai le faamanatu, tauologologo o tiute faa-tagatanuu.

O le aofai o tagata resitala fou mai i le 2016 e oo mai i le tausaga na tea nei, e 16,000. Ua matauina foi e le Komiti Faapalemene ia le vave o Lipoti Faaletausaga mai i le Ofisa o Palota. E fia faamauina ai le faafetai ma le faamalo i le Komesina o Faiga Palota, Tofa Faimalomatumua Mathew Lemisio. Malo le galue punouai, malo le le faalogologotiga.

Ae e fia faailoa atu i le agaga faaaloalo nisi o galuega ausia o lou avea tauaveina o le tofi Minisita o Faamasinoga faapea le Ofisa o Faiga Palota. Muamua, o le fausiaina o le fale mautu o le Ofisa o Faiga Palota lea ua toe o se aga maea lea. O le taimi muamua lenei ua fausia ai se Ofisa faapitoa o Faiga Palota i Tala Faasolopito a le Malo Tutoatasi o Samoa. 2 fausiaina o le Ofisa fou faaonaponei o le Matagaluega o Faamasinoga i Salelologa, lea ua amatalia le galuega, o le Ofisa fou o le suia ai le Ofisa tuai i Tuasivi.

3, faauluina i le Palemene na pasiaina ai Tulafono nei mo le manuia o Samoa ma ona tagata. Tulafono o le Teuteuga o le Faavae 2020, Tulafono



o Fanua ma Suafa 2020, Tulafono o Soligatulafono 2020, Tulafono o Faiga Palota 2019, Tulafono o Itumalo Palota 2019, Tulafono o le Ofisa o Komesina o Faiga Palota 2019, ma le Tulafono Taufaaofi o Teuteuga o Faiga Palota 2021, lea o le a faagasolo nei.

O ni Tulafono na eseese ai finagalo o le atunuu, e maua o lo o tetee pea i ai isi e ui ina ua maea ona pasia nei Tulafono. O lena ua taoto i faamaumauga a le Palemene lau folasaga faa-Minisita, a o lumanai le faitauga faa-3 o Tulafono nei e 3, sa vavao ai le atunuu. E talitonu lou sui usufono o le taimi ma le ituaso lenei sa moemiti i ai o tatou tuua i le Fono Faavae, ina ia amanaia ma aloaia tu ma aganuu a Samoa ma ana pulega i totonu o le Faavae.

E avea foi lenei avanoa e momoli atu ai lau faafetai i le Afioga i le Minisita Lagolago le Tofa a Soalo Mene, sui usufono mo Gagaifomauga Nu.2. Faamalo le faufautua. O lau tuualalo, o le fesoasoani malosi lea i le tele o faaiuga ausia i le galuega faatino a le Matagaluega ma le Ofisa o Faiga Palota.

Ou te toe fia faafetaia le itumalo faaalaalafaga o Vaimauga Sisifo Nu.2 i la outou lagolago na to mai e avea ai au ma tou sui usufono i lenei Paeaiga. Faafetai mo le tapuaiga.

Ae talu ai ona o suiga fou lea ua fai e amata faamamaluina i le faiga palota o lo o loma nei, e fia oo i ai se faamatalaga i lou itumalo faapalota o Vaimauga Nu.4. Faafetai i la outou lagolago mai i le taimi o nei fesuiaga. O le tatalo, e fia faaaauu pea le tautua i le tatou itumalo. To maia la outou pule, se i faamaea galuega ua faamaonia o le a manuia ai le lautele o le itumalo.

Faafetai foi i tuua o lou itumalo o Vaimauga Sagauga i le tou silasila mamao i le taua o le lagolagoina o atinae a le Malo a o tauasa mai le saolotoga o Samoa e aofia ai le avea o Apia ma taulaga, o le falemai i Motootua faapea le uafu i Matautu lea ua aea ai le augatupulaga ma le lumanai.

E momoli atu lau faafetai i le Malo i le magafagafa ma le silasila mamao ina ia fausia se isi uafu i Vaiusu e tali atu ai i faafitauli ma luitau o lo o faafeagai ma le uafu i Matautu. Ua ala ona ou tautala i le tulaga lea, ona o lea sa togi le maa a lenei itumalo aua le manuia o Samoa ma ona tagata e auala lea i le lagolagoina o fuafuaga a le Malo mo le manuia lautele. E leai se Malo na te faia ni atinae e leaga ai ni ona tagatanuu. E fiafia la le sui usufono o le Tu Taulaga i Sisifo po o Faleata Nu.2 e faaoga le taulaga i Apia, o le falemai i Motootua faapea le uafu i Matautu mo ana pisinisi, ae musu e togi se maa e manuia ai lona aiga ma lona itumalo.

**Afioga Faumuina Asi Pauli Wayne Fong:** Lau Afioga i le Fofoga Fetalai, pe maua lava sina avanoa se i taumafai atu ai lava se... i lau Afioga.

**FOFOGA FETALAI:** Ia, o le mea lea sa ou popole ai, se malie le sui usufono o le Tu Taulaga i Sisifo ma lau Afioga i le Minisita, o itu ia sa ou popole i ai. O le mataupu lea, e ese le manino o le folasaga a le Taitai o le Malo, ae faapea foi nisi o sui usufono e aafia le uafu ma le atinae i latou matafaioi. Ae o lea ua e toe oo foi i ai, o le mea lea e igoa o le sailiili masei. A sailiili masei loa le saunoaga a le sui usufono po o le Minisita, ona tau mai loa lea i i, o le Minisita lena e fiafia e faauo i le fetotoai. Ae o le mea e i ai se malo mamalu e faapena ona filemu tagata. O le mea la lea, alolofa, o le sausau e tuusao, o le sausau a le Taitai e faamanino ai upu tuusao. Ae alolofa foi outou, a maea ona sausau le Palemia, ona faapena lea ona fale i le Atua outou finagalo. A ua maea mataupu e aafia i lau matafaioi, ia faaiu mai lau saunoaga leaga o lea e tele tatou galuega ia e fia fai.

Ae ou te faamalulu atu i le sui usufono ua ou manatu lava Faumuina Wayne malo faafetai. Ou te iloa foi o oe o le tagata... ua faafia ona ou faafetai atu ia oe i le taimi o faatasiga foi ma faigalotu a le tou Ekalesia e te taulamua lava i le aufaipese, ou te le iloa ea po o oe e taina le piano ma mea faapena. Ioe. Malie ia e faapena, o le uiga o le soifuaga e faapena. O le mea la lea, se i tulai maia lau Afioga i le Minisita, aua le toe faaleagaina lau sausau ua manaia lau sausau. Ae ifo mai ma faaiu mai le saunoaga.

**Afioga Hon FAAOLESA KATOPAU T. AINUU:** Ou te faamalulu atu lava i lau Afioga i le Fofoga Fetalai. Leai o le vaega lea sa ou oo i ai, o le faatusa sa foai laueleele o lenei itumalo. Faapea ai e faapea le agaga o le sui usufono mai Faleata. Ae le afaina o lena ua e saunoa.

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai, na o si mea lava sia...

**FOFOGA FETALAI:** Soia e te faalavelave Olo o la e tau sue le pepa e sosoo ai le lauga a le Minisita.

**Tofa Olo Fiti Afoa Vaai:** Ia o le ala lena sa tau fai atu sau tala se i maua pepa a le Afioga i le Minisita ona ou toe nofo lea i lalo. Faafetai i lau Afioga.

**FOFOGA FETALAI:** Se Olo se se i alofa ia, o oe le isi toeaina e faamoemoe i ai le Fofoga Fetalai. Ou te malu ia outou. E le iloa po o le mea lea ua ta mai ai talu outou. Se i faaiu maia lau saunoaga. Se Afamasaga, Toeolesulusulu, se se i aveifo le pepa o lena foi ua e nanaina le pepa. Se o au amio faa-Aana lava ia.

**Afioga Hon FAAOLESA KATOPAU T. AINUU:** Ua tele lou fesetai i saunoaga a le Minisita. Ae ou te le i seu lou sa i fanua, ou te fia afea si ou itumalo faapalota o Vaimauga Nu.4.

**FOFOGA FETALAI:** Ia ua a la? Faaiu mai loa.

**Afioga Hon FAAOLESA KATOPAU T. AINUU:** I le afio o Alo o Sina ma fuaifale o Salevalasi ia Tamaseu ma Faualo, le Matua ia Faaolesa ma Onofiatele, aemaise le tausiga a le faletolu ia Tuiletufuga ma Letaa, faapea le Vainalepa ia Falasii ma Lealasila, faapea le loaloa o le paia ma le mamalu o Samoa, tupu ma tamalii, saao ma aualuma, sao aumaga ma aumaga o lo o afifio ma papaaao i totonu o fuaiuala eseese o le tatou itumalo. Faafetai tele i la outou lagolago, ae to maia la outou pule ou te toe folau ai i lenei 5 tausaga o lumanai.

E le faagaloina le tapuaiga a nai ou tama faaleagaga, le Susuga i le Toeaina ia Fiti Aloalii o le EFIS i Apia, lau Susuga i le Toeaina ia Efu Efu EFKS Aai o Niue ma le Susuga i le Toeaina ia Utufua Naseri lea ua malolo manumalo mai le EFKS i Apia i le 2019, faapea le Susuga a Talalelei Tuua o le EFKS i Mulinuu, Susuga Komisi Samuelu EFKS Fugalei i Sasae, Laupama Solomona EFKS a Sogi, Susuga Peseta Auvaa EFKS Leufisa, Susuga Faatafa Nefu EFKS a Alamagoto, Susuga Maliota Siaea Metotisi i Matafele, Susuga Palota Vaili Metotisi Aai o Fiti, Patele Spa Silva Katoliko Lalovaea, Patele Maresa Kalolo Patele Palisi, ma le loaloa o le afaigaluega tofofi a le Atua o lo o galulue i totonu o le tatou itumalo. Faafetai mo talosaga molia aua se manuia o le tatou itumalo faapea le atunuu.

Ou te faamalo atu foi i nai uso ma si ou tuafafine o lo o matou tausinio faatasi i lenei faiga palota. Faafetai i lo outou naunau e tautua lo tatou itumalo. Tatou te naunau uma lava i se mea lelei mo lo tatou itumalo, ae tatalo atu, to maia la outou pule, ua see lou sa. O au nei, ae o oe taeao.

Le paia o si ou itumalo, sa ou seu i falemua ae sa outou seu i falevaai ma outou seu tapuai. E le taumate na i ai ituaso na seutafili ai le naaloa i gagana faa-tama a la outou auuana. Afai ua paopapa se lafoga, alofa faafoi mai ni ou vaivai, aua ne i liaina i ala sou leaga, aua e potu lava le tautai ae se lana atu i ama. Ia manuia le Fonousu a Samoa.

*Na faaalua le agaga fiafia o le Palemene i le patipati o latou aao i le maea ai o le saunoaga talifuaitau a le Minisita mo Faamasinoga ma Pulega tau Faamasinoga.*

**FOFOGA FETALAI:** Malo saunoa. Tatou te le fevii ai, ae puupuu anoa le saunoaga a lau Afioga i le Minisita. Ae ua ou manatu e tele lau tapenaga, ae o lou fesoasoani mai i le galuega a le Nofoa ma le tatou galuega o lo o

faapena ona faasolo nei. E i ai le manatu tatou te toe Fono foi nanei i le po, ma le faamoemoe o le Taitai o le Malo a o atu ae le i maea lelei saunoaga a Minisita, ia ua tuu foi lele, o le a le taimi e uma ai. Ia o le alofa lena e taumafai atu ai le tatou galuega. O lea ua ou mautinoa o oe le isi Minisita pito sili ona e alofa i le Fofoga Fetalai. O le mea la lea, o lau tatalo, ou te tootuli i le mea pogisa ma ou tatalo ia manuia lou faamoemoe i lau faiga palota.

O lea ua oo mai le faasologa, ma o lea lava e lava le tatou taimi i lau Afioga i le Minisita o potu foi faaonaponei i le tulaga Faatekonolosi.

Ia, se i tulai maia lau Afioga Toeolesulusulu lau Afioga Afamasaga, o oe lava na e matematea Malo aua le itumalo o Aana. Tulai maia e saunoa, ou te masalo e le umi foi sau saunoaga aua e te saunoa faalauaitete i le tulaga o lo o i ai. Ia manuia le saunoaga.

**Afioga Hon AFAMASAGA LEPUIAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo):** Ia, e faamalo atu i le Afioga ia Faaolesa mo le saunoaga matagofie. Faafetai tele i lau Afioga i le Fofoga Fetalai aemaise foi le mamalu o le Maota i lenei aso, ua matauina, o lea lava ua oo mai i le siui o le tatou faamoemoe, ua toe foi o se aga ona faaee lea o tatou foe e faatini folau aua le fonotaga mulimuli a le Palemene.

Ae le i amataina lau folasaga lau Afioga, o au ou te... e le gata ina ou Minisita ae ou te trainer i le mea lea o le soifua maloloina. Ma ou te faamanatu pea i lenei Maota, ou te i totonu o le matou vaega lea o le one touch ministries. Ma o lau vaai, ua leva tele ma umi le tatou Fono. Ma ou te tilotilo pea i le nonofo faasasao ma alaala faamalo le mamalu o le Palemene, tulou. Ae o le fautuaga faa-trainer, o le tulaga o le soifua maloloina po o le falemai foi, faagaoioi lou tino. E pei o nai mea ia o lea e sau i luga o le TV i lenei taimi ma le leitio, aemaise lava i le tala le la i tua i le Afioga ia Sula ma le Afioga i le Gafatasi. Faagaoioi lou tino, fai ma pamupamu faapea ou aao, e gaoioi ai le toto, ona e toa loa le toto ona afaina lea o lou soifua maloloina.

**Afioga Sulamanaia Fetaiai Tauilili Tuivasa (Vaimauga Sasae):** Lau Afioga i le Fofoga Fetalai, ona o lea ua afea fua lenei itumalo. O se agaga e tulai atu ai le sui usufono lenei o Vaimauga lau Afioga i le Fofoga Fetalai. E manatu lava le sui usufono lenei e le lagolagoina le finagalo o le Minisita, ae ou te manatu o le lauga lea sa lauga ai le Minisita lenei o Faamasinoga ma Palota, o ia tonu lena o le Vaimauga. Ua ou tatalo atu ai, faauma ai i le tatou Fono i lenei aso, e le mafai ona sosoo mai se lauga i lauga a le tapunuu. O le mea foi lena sa ou fia tu atu ai i luga, a lauga lava le Minisita lenei o le Vaimauga, lea sa lauga i atinae a le Malo i totonu o le Vaimauga. O le agaga la lea ua ou tulai atu ai lau Afioga, e le mafai... po o

le a sou finagalo ae faatu se lafo ina ia uma le tatou Fono leaga e le sosoo le Vaimauga ma Aana i le tulaga lea o le a saunoa ai le sui usufono lea.

**FOFOGA FETALAI:** Oi, ia e faapea e te manatu mai Tuisamau ia Pulemagafa lea e i le Nofoa i le ta avafatafata, a o lea ua e faatonua mai le Nofoa e faauma le Fono. O se faamaualuga ina tetele. Na ou fai atu foi o le Fofoga Fetalai e loto faamagalo, ou te le talia lou finagalo, ae faaauau pea. Tulai mai lau Afioga, lea sui matua o Falealili.

**Afioga Fuimaono Teo Samuelu Teo (Falealili Sasae):** Lau Afioga i le Fofoga Fetalai, i le faaaloalo tele e tulai atu ai, ona ua afea fua lenei itumalo. E masalo a tomanatu i le Fonotaga a le Palemene i le 2018, o lea foi na saunoa i ai le sui usufono. O le 2019 foi na fai ai foi lana faataitaiga. E pei lava o maua e fai ai faataitaiga a le Afioga i le Minisita lea. O le lelei ia o lana fautuaga, ou te talitonu foi o se tuualalo lelei, ae le o i e aumai ai lana tuualalo lea, e aoga mo fafo i taimi o toleniga ma tulaga faapena. Ae le mo le Palemene, aua e i ai lava taimi faapitoa e toleni ai sui o le Palemene. Ua uma ona ou faamanatu soo i ai, aua e te fai ma fesiligia le malolosi o ou lima. O lea ua uma ona ou faamanino i ai. E fai si malolosi tele o ou lima toe vavave, aua ne i faaseseina ia i le tino. Ma lou agaga faaaloalo.

**FOFOGA FETALAI:** E pei o le matau a le Minisita aua e ese lava le malolosi o lima a o lou sela ia. O le a la le mea e mafai e lima pe a sela? Malo faafetai.

Se i tatou fai totoe...leaga o lea ua e tulai mai. Saunoa mai Lealailepule, se alofa ia e faapuupuu mai.

**Tofa Lealailepule Rimoni Aiafi:** O lea ua ou fautua atu i le Afioga i le Minisita, e a pe a tuu mai se i ou amata le ma faamoemoe, se i ou tali i le toa- lua lea. Afai foi e leai, ou te tatalo atu i le Minisita o Faatoaga, au mea faipele foi lea na e sau ma oe, se i ou topea ai le laititi lea.

**FOFOGA FETALAI:** O le taimi e malolo ai le tatou Fonotaga, o le a faaaga mea faipele a le Minisita. Malo faafetai.

**Afioga Fuimaono Samuelu Teo:** Lau Afioga i le Fofoga Fetalai, e ese le manaia o le saunoaga a Faleata. Leaga o lea e tau mitai mai e Faleata le la fusuaga ma si faipule laititi lava o le Palemene lea na i ai. E tusa lava o la e fasi lona atalii i le mea lea e fai ai. Vaai la ne i te i ua sese mai le sui lea o Faleata.

**Afioga Hon AFAMASAGA LEPUIAI RICO TUPAI:** Lau Afioga i le Fofoga Fetalai, e avatu ai pea le fautuaga i sui mamalu. O le isi lava mea taua o le taumafa o le vai. O lea lava e fesui ai au faguvai i taimi uma. Pe uma ifo le tatou poloka muamua o le galuega ua 4 au faguvai e inu. A o lea lava ou te tilotilo atu e le o taumafa vai le mamalu o le Palemene. E taua le vai mo lou soifua maloloina. O ituaiga mea lea a oo ina leai se vai ma mago foi lea musele o lou tino ona tulai mai lea o le ituaiga mea lea e tulai mai ai Tuisamau, le Afioga ia Sulamanaia. E matua sese lava o le mea. E manatua foi le feaveaina o le aufai foi lea lau Afioga, ia ou te le toe tau faamatala lea mea. Na toe iu lava i tua i tama i tua i le Usoga a Tutuila ma Ape, o laua ia na o, malaga i Tutuila o mai ma le moli lea sa momoo i ai le tama. A o fea sa i ai Tuisamau ma i latou uma i lea taimi? E le i maua nisi, ae soia lau Afioga...

**Afioga Sulamanaia Fetaiai Tauiiili Tuivasa:** Lau Afioga i le Fofoga Fetalai, leaga o lea e tapuai si ou itumalo. O le Aso Toonai lea na tea nei, mo le silafia e le Maota ma Samoa, sa fai ai le taaloga lea o le lakapi. O ai na manumalo? O fea le nuu e sau ai le au lea na manumalo? A o le aufili a Aana lea na aumai e le Afioga i le Minisita. E leai ma se mea na maua, o le nuu leni o Lauili na siamupini ai, o le tama o le eleele. O le mea lena e fai atu ai i le sui lea, e le taitai, leaga o iinei e muamua oo mai ai mea iinei i le Vaimauga, faatoa tufa atu ai i tua. Ma lou faaaloalo.

**FOFOGA FETALAI:** Ia malo faafetai. E sao uma oulua. E leaga o lea ua tatou taunuu i le taimi e uma ai le tatou galuega, ae faagata ia i i, ia pepelo.

Malo faafetai, o le mea e fai totoe le tatou galuega, e manaia foi le faafofoga mai o lo tatou atunuu, se o taitai o le atunuu o la e fai a latou...tau vevesi tau vevesi ae faai lava i le totoe. O le mea la lea, e momoli atu le faamalo ma le agaga faafetai i le paia o le Palemene, aemaise foi o le faafofoga mai a Ofisa Sili o Pulega o Matagaluega ma Faalapotopotoga a le Malo. A i ai foi se upu a le Nofoa e paopapa pe letaugamalie, ia e manatu lava e malu ia outou. Ona faapea lea, saili le malosi mo le afiafi nanei.

O le a faataatiaese Galuega a le Fono Aoaofaitulafono tatou malolo, tatou toe tauaofia i le itula e 6:00 i le afiafi, e amata ai le tatou Fono.

*Na faataatiaese Taulumaga a le Fono Aoaofaitulafono i le itula e 12:53 i le aoauli seia aulia le itula e 6:00 i le afiafi.*